

皇明嘉隆聞見紀

午



皇明嘉隆聞見紀卷之七

癸卯嘉靖二十二年

春正月

丙午朔日食

上御奉天殿受朝時即中林廷琛主事周卿御

史蔡駿司正李天然等俱以失誤朝賀為鴻臚寺所糾上怒其不恪

下錦衣衛獄因各降調外任其日糾奏御史來聘以糾奏不時奪俸三

月○大學士翟奎以病請告上遣醫診視疾中使齎賜酒米諸物○

詔改給山西三關東西二路參將勅書東路駐代州東起平刑關東界

西盡代州境西駐偏路關東起寧武東界西盡黃河七堡境改廣武站

備禦于北樓口隸東路增置守備于神池堡隸西路發太僕寺銀三萬

三千兩令撫臣市馬給其軍從總督翟鵬巡撫李珏請也○詔各撫按

等官通將所屬大小官員課第殿最彙造揭帖封送吏部以備朝覲考

察黜陟未為定制○召起致仕南京刑部尚書周用為工部尚書總理

卷之七

河道既而工部請加用憲職庶便行事 上以祖宗時總治河道原無兼職已之○戊午月犯鬼宿積屍氣○詔改派兩淮等運司鹽引共計九十萬有奇計銀三十四萬餘兩俱貯宣大鎮備調遣客兵支用時總督侍郎翟鵬以是為請故有是命○詔廷杖御史來聘鄭光溥尋調外任時當啟蟄行祈穀禮于玄極寶殿命成國公朱希忠代是日光祿少卿陳叔順等十四人陪祀不至 上怒其不恪各降三級外調乃以聘光溥職糾儀失于查糾廷杖之調聘四川丹陵知縣光溥陝西澄城知縣○尚寶司丞桂輿有罪令革任輿因九廟災乃私擬增建廟制輪次繪圖上之併進所撰頌聲俗辨諸書高自稱許禮臣叅劾其狂妄希進鼓惑觀聽詔逮繫法司鞫之法司當與納贖還職 上特命閑住輿之子也○命增置陝西延綏西路安寧安定二保初西路叅將雖移駐舊安邊營然而地勢孤懸西至定邊營東至安塞營各百里許總督尚

書楊守禮請於中道各設一堡以便策應從之○二月詔改南京禮部尚書張壁為禮部尚書趨令速赴供職○勅賜都督姜漢祠名憫忠以漢死安化王變故也○勅建二忠祠於山西先是都指揮丁璋周宇先後禦虜而死至是立祠祀之○給事中陳棐請行大閱大射禮部議覆不果行○詔發太倉銀并京通二倉粟米于宣大二鎮時宣大總督翟鵬言前發帑銀夏秋防禦今虜警在春初乞增銀接濟戶部議請發太倉銀四十萬應用又宣大米價踴貴宜于京通二倉坐撥十萬石赴宣府十五萬石赴大同以濟軍士實用既而鵬言大同道途險遠轉輸實難乞將大同糧米盡留宣府以給客兵將宣府糧草價銀移支大同庶彼此通融兩鎮均便從之○三月遣官詣天壽山祀陵時大學士嚴嵩言陵工告完歲清明日宜詣陵舉春享禮于 上欲親行已而不果乃遣英國公張溶代○巡撫保定都御史丁汝夔請實邊儲言國初邊糧

悉徵本色以故倉廩盈餘邇來改折軍士多不得實惠枵腹待敵所以
往往不支今後宜於豐歲徵本色七分解倉積貯以後貴收本色賤則
收折色庶士卒可以終歲無餓戶部言各邊事體不同宜行邊臣酌處
○貴湖苗叛召起萬鏜為總督副都御史率兵討之先是湖貴之間有
山曰蜡爾又曰蠟爾諸苗居之苗古三苗遺種也山東北屬鎮溪千戶
所稍南屬篁子坪長官司隸湖廣辰州府山西屬銅仁府銅仁平頭二
長官司隸貴州西北接四川之西陽宣撫司地東西可二百里南北百
二十里苗雖分土隸兩省中蜡結竄徙實相藪匿然各土官相轄有戶
籍稍輸賦典廣西徭種不同其屬鎮溪者半與瀘溪編民雜處所墾種
多瀘溪田供徭役雖時小寇竊未叛也有篁子坪土官田興爵以事繫
辰州獄諸苗以其地主也歛賄賂吏以計脫深匿苗寨主奉之興爵反
雷苗多求索涵苗妻女諸苗怒逐之燬其公署遂叛日相曼引鎮溪苗

亦叛其貴州銅平苗則土官弱不能制而有司又不能撫恤其屬時有
叛苗不納稅糧官以逋欠責見戶見戶並多逃亡官府嚴督土官平頭
長官遂携印逃諸苗悉騷然叛共保蜡爾山結砦自固湖貴諸守臣討
之不能定遂以事上聞 上欲遣官剿撫僉薦萬鏜時鏜家居乃就家
召起為副都御史開府辰州令相棧撫剿鏜乃徵諸路漢土兵進討之
○召起用莊浪故都督魯經經善曉夷情緩急可用 上聞其才乃令
宣大總督翟鵬訪取委任兵部尚書毛伯溫請檄經自選丁壯及莊浪
漢兵同赴軍門聽用經以莊浪兵寡請得並選山丹永昌涼州鎮番西
寧五衛務足兵五千鵬許之 上令促經赴鎮○遣內臣蘇杭織造時
尚衣監太監李鉞請乞遣內臣赴蘇杭福州等處監織御用袍服從之
給事中蘇應旻言大江以南賦役繁重加之災害相仍海寇竊發昔擅
殷富之名今實凋敝之極若遣官監織徵需害下其端一開遂為勵階

乞收成命移行工部勅各撫按如式督造不報○方士段朝用論死初朝用以黃白術結郭勛干進授紫府宣忠高士既而改羽林衛百戶又改紫府宣忠仙人久久伎窮因脅索勛賂搗死勛家廝役復上書瀆奏上怒收繫論死竟死獄中○夏四月大學士嚴嵩解部事以張璧至也嵩既入閣即竊弄威柄諸司建白必先白嵩而後敢進御于是副封苞直駢填戶外而大學士翟奎徒以位望先嵩翼孤且輒猶以階軋嵩嵩啣之二相遂因有郤○安南都統使莫福海入貢時福海謝恩修貢上令齎使如故但罷賜宴稍減供饋以示非陪臣禮○兵部尚書毛伯溫疏陳總督事宜納之伯溫言屬者並置總督大臣是宜允濟而臣猶有過慮者四自古閩外之臣彼此調和則士豫附但事權相埒嫌隙易生可慮者一自古命將出師最忌中制若往復奏請必至坐失機宜可慮者二近年邊務廢弛已極非旦夕可以責成恐言者隨諫其後可

慮者三總督大臣得專生殺諸將不遵約束即加以罪可慮者四臣請文武同心決策共濟時艱軍中一切機宜不從中制雖有小失朝議宜諒其心邊臣亦當盡心展布即有人言宜自省待命不當槩求引避所轄自總兵以下有所抗撓即許論斷如法 上俱嘉納○戶部侍郎張璉卒璉耀州人賦性剛直不畏強禦初武宗駐蹕太原有儀賓坐殺人下獄者賂江彬乞免彬矯詔赦之璉曰天顏咫尺憲臣不親奉詔旨其孰敢信竟置之法○五月大理寺卿汪文盛卒文盛崇陽人才猷敏贍以功名自喜初武廟遊幸文盛疏諫廷杖有直聲後撫雲南屬有安南之役屢上方畧鑿鑿可稱○詔奪文選郎中王與齡官為民初內閣嘗以親厚者屬文選不以為異與齡過文選執法不聽請託時大學士嚴嵩囑選監生錢可教知縣不從大學士翟奎囑調刑部主事張惟一于吏部又不從嵩屢嗾言官劾奏與齡又遺書御史沈越越于衆言官前

裂其封遂發其圖陷文選之奸嵩大恨典齡知為二輔臣所鄙乃因尚書許讚疏白囑託事讒嵩辯令削籍○六月詔清查京衛冗食官負旗後先是兵部請革冗食上命揆差風力科道官乃遣兵科給事中楊上林御史沈越清查京衛京營官軍力士匠役之冗濫者○詔禁士民冠服之詭異者時為凌雲等巾競相馳逐僭擬多端禮部上言巾服有乖禮制乃詔中外所司禁之

謹按吳司訓瑞登曰惟王盡制代有所易而臣子恪遵罔敢或違我太祖革胡服胡語復中國之冠裳等威有辨士庶不得僭擬嘉靖以來浮華漸盛競相夸詡不為明冠明服務為唐巾晉巾金玉其相錦繡其飾揚揚閭里豈徒識者鄙之其得罪朝廷甚矣宜令有司嚴禁市易庶可挽回風俗追復醇龐之舊矣

詔逮繫給事中周怡于獄時大學士嚴嵩翟亦金構卻怡乃上言風教之

大禮讓為先禮讓之行朝廷為首朝廷有違言之隙則讒譖之叢生于人大臣有動色之爭則攻闢之禍流于下由今溯昔未之或易陛下臨御以來二十三年於茲求治銳憂民切宜乎太平有象四夷來王今陛下日事禱祀而水旱災荒未銷歲開輸納而府庫未充歲蠲租賦而百姓未蘇時命選練而邊境未寧由陛下勞心焦思于上而下未有將命之臣耳為輔臣者宜同心協力以佐陛下而大學士翟亦金嚴嵩憑藉寵靈恃恩修怨聞在內閣違言失色入見陛下各私陳背詆是二臣已不和矣安望其事上而風下也嵩之威靈氣焰凌逼百司凡有陳乞雲集其門先受其意而後聞中外之臣不畏陛下而畏嵩蓋則依阿澳忍僅能自持勢不足以驅人而名位先嵩又足為嵩之妨礙吏部尚書許讚世掌銓衡小心謹畏而直氣正色不能銷權勢要求之心陰擠陽排互相詆訐視陛下為何如主臣恐大臣不和則儉邪乘間黨比媒孽非國

之福日者抗論輔臣如御史謝瑜童漢臣皆以他事罪謫去伊敏生翁時等亦已露於聲色臣恐諫臣之口自是箝閉雖有樛杌驩堯誰復言之可懼甚矣即今初秋宣府已報虜警而文武總制大臣各立門戶不相和同則臨敵決械甲可乙否其不僨事敗謀吾不信也伏乞陛下明離照奮乾斷戒輔臣無修怨以竊威福戒吏部無依阿以忽黜陟戒撫臣毋辱將佐以離士心戒將佐無緣小故以敗大謀陛下更優容言官博採群策先務和德於上俾大臣公忠為國慮已忘讐各務和諒於下則神之聽之終和且平 上曰怡謂諸臣不和負君肇禍其言良是第其心主於訕上謂朕日事禱祀不務和德于上爾夫朕事天禮神多尙庇祐至於四方之廣豈得盡無水旱若爾有位果能秉公竭忠修和盡誠同心贊主何患不治諸臣不和即時奏劾至今方言何也其輸心復奏以聞怡復奏上詔廷杖如楊爵例錮繫之○詔給朝鮮國民衣糧護

送還國時朝鮮國民洪贊等四十二人航海遇風飄入通州海門界守臣傳詣京師詔給之衣糧遣官護送歸之○詔賜總督尚書楊守禮巡撫張聰總兵官吳璠等銀幣時虜自正月至四月屢犯延綏江崖溝大沙梁草灘墩長海子等處我師迎敵追勦前後斬虜首七十級事聞上嘉諸臣功故賜金幣有差既而守禮乞致仕 上以疆圉數警守禮不念人臣死事之義乃負恩求避命降俸二級該部不行叅奏切責而宥之○太子太保禮部尚書掌太醫院事許楮卒賜祭葬如例其妻緣洪熙中本院使蔣用文例請謚禮部議覆詔特謚恭僖○以火災免鳳陽諸府州縣稅糧有差○巡撫山東都御史曾銑言近議增州縣民壯山東地瘠民貧不堪重役然新以防虜所招集義勇在官可即編入均徭免其雜役以克民壯報可○詔復致仕大學士賈詠原官詠初以少保兼太子太保禮部尚書致仕會車駕南幸承天詠出迎謁於途失誤

卷之七
六
陛見詔落其散官以尚書大學士家居至是年八十守臣以聞 上曰
詠耆舊重臣年躋八十齒德並茂其賜之羊酒令河南巡按官及門存
問仍賜月米輿夫以示優眷尋又以守臣言詔復原官如故○發太倉
銀三萬兩於榆林寧夏二鎮以備客兵糧餉又發銀三萬二百兩於宣
大三關充募軍費○秋七月分遣神樂觀樂舞生齎香帛詣先聖帝王
陵寢所在令有司致祭○寧夏地震○太醫院三皇廟成名其殿曰景
惠門曰成濟遣禮部尚書張璧祭告○金星晝見○命加西海夷人都
指揮僉事王中為都督僉事先是遼東撫按官言中先年冒貢害人朝
命絕其入貢近中偵報虜情有功乞許其入貢仍加陞賞以示激勸故
有是命令約束部落入貢年諭以舊罪朝廷業已置之宜益修忠順以
厚圖報效○奪陝西都指揮僉事陳謨以下三百四十五人俸三月以
軍馬器械墻堡損廢為巡按御史周南所劾故也○御史沈越疏請革

戚畹冒襲從之先是 上諭武職不由軍功不許承襲係祖宗舊典今
後皇親子孫亦無得冒濫世襲越因上言臣奉命會同兵科給事中楊
上林兵部主事年朝宗遵奉清查但世代有遠近情義有戚疏族屬有
異同事體有輕重然情以展愛孰非難絕之親義以制情實有不偏之
則臣等查得數內廕及所生可矣而或以及同宗之姪尊及母黨可矣
而或以及兩姨之親甚則乳母微品亦受榮推既蒙誤恩又克永世殆
非所以昭名列等垂大訓於方來也孔子曰唯名與器不可假人陸贄
曰名近虛而於教為重由是言之則裁抑之法在今日誠不容已因將
合革人負具名上請 上允行○上禱雨有應示輔臣感雨詩時久旱
癸丑 上禱雨于雩壇是日雨百官疏賀 上曰天降甘澤朕心感仰
卿等其竭誠贊輔遂製感雨詩頒示○熒惑入南斗占主東南大饑是
冬江南米價數倍于常○禮部尚書溫仁和卒謚文恪仁和華陽人歷

事三朝以醇謹稱○八月虜入榆林塞又入甘州塞○臨清城成巡撫
山東副都御史魯銑巡按御史何允魁等俱賞賚有差○山東獻瑞麥
嘉禾時泰安州產瑞麥又生嘉禾知州馬逢伯奏獻會西苑亦有瑞穀
上曰瑞在稼穡非珠玉不可食者比况禁苑之秀又當雩禱禮成上
天恩賜豈可輕視于是群臣表賀○九月南京右都御史何瑋卒瑋懷
慶人博學篤行以古人自期嘗謂象山慈湖之學流入禪定充塞仁義
後追謚文定○刑部錄上大辟囚請行刑詔已之○詔逮繫巡按山東
御史葉經詣京廷杖死初葉經劾大學士嚴嵩受王府表袖惟熈賂嵩
郅之及經監臨山東鄉試進呈試錄嵩摘錄中有諷刺語激怒 上意
上手批曰策語含譏訕禮部尚書張璧遂言今歲虜不入犯乃陛下
廟謨所懾而策謂饜飽而去乞逮治考官 上曰省闈事出巡按教官
徒署銜耳葉經狂悖不道速逮治之乃械繫至京杖闕下遂死布政陳

儒以下俱謫邊方雜職○冬十月詔革順天冒籍中式舉人初順天鄉
試歲多冒籍中式禮科給事中陳棐劾奏之歷陳京闈之弊 上令冒
籍生負送提學覈實具奏時被論者十餘人而鄭夢綱陶大壯沈譜丁
子載陸可成翟鍾玉六名以詐冒回籍○詔罷考功郎中胡鯨時南京
御史韓一古等奏劾鯨及稽勲郎中李愷貪墨不職狀乞罷黜以重觀
典部院議改別用 上曰許讚等且不究命照不謹例罷鯨愷補別部
○十一月以許穀為文選郎中穀自考功歷司封郎至是改文選時行
取官候選日久俗弊後任者至多反前所舉而低昂之穀曰此不肖之
心也亟白於尚書許讚行之讚曰大覲伊邇須覲後行穀曰覲官叢至
萬一有蜚語則行取者難為去留讚聽其言竟以二日畢考選事僉謂
公而厚云既而擢南京太常寺少卿○禮部右侍郎馬驥卒謚文簡驥
綏德人始為編修諫武廟南巡廷杖平日工文詞明習典故更深沉有

大節時稱詞臣之選云○詔復太廟合享制 上勅諭禮工二部曰頃
會議欲奉皇考於孝宗廟雖有兄弟同室之義然題扁各殊終為未妥
夫禮非天降乃起人情祖宗列聖惟聚一堂斯實時義之順者茲當建
立新廟仍復舊制前為太廟後為寢又後為祧時祫時享奉太祖高皇
帝正位南向成祖及群廟我皇考同堂而序享獻既畢則奉主各歸于
寢庶昭穆不紊世次以明勅行之○詔奪巡按貴州御史魏洪冕官為
民時試錄亦有訛舛令洪冕削籍布政侯緘以下降謫有差○十二月
詔旌表孝子張鈞初石州人張鈞正德間舉于鄉以親老不仕讀書奉
養孝行著聞鈞父赦大學生始亦以親亡不得祿養誓不仕隱居城中
辛丑虜大入寇至石州城下赦為擄去鈞聞之馳騎入虜中求父為流
矢所中累創前往至則父已死哀痛殞絕少甦盡飲父血而死至是撫
按上其事詔旌之因旌石州同時死者孝子張承相烈婦白氏等十一

人承相州學生少孤虜至負母以逃為虜所得承相抱母叩頭虜怒俱
殺之抱母首而死于博生二歲而孤母居村舍博從城受書虜至城下
號泣求母母已被執道遇之取石擊賊賊就剖其心殺之母得遁去博
死年十八掾吏張永安父為虜所逐永安持挺走殺之擊傷二賊趣父
逸去身後護之被數十創死安勳妻白氏聞賊入塞從夫匿土穴賊攻
穴甚急度難俱生令夫逸去罵賊不辱身被十餘創死牛宗近妻李氏
家貧隨夫傭作夫為賊所得伏夫身求代賊俱殺之山下侯景儒妻吳
氏賊至走山洞其旁女皆已掠去度難獨免乃推兩兒山下自投水賊
曳出載馬上遂自刺其面不辱賊殺之喬甫妻郭氏母家甚大而夫甚
貧奉舅姑極孝謹賊至不屈被殺狀與白氏同典膳張環妻李氏年老
寡居張蘭妻馮氏年二十而寡守義三十餘年俱罵賊不屈而死烈女
賀氏年十七未嫁賊至從父匿山洞被執罵賊死温氏年十六與母俱

被擄伏地不肯從賊死沁州學生溫繼宗貧苦而孝父沒不能娶虜寇
邊咸勸入城避之不肯賊至與叔父淵等力戰擊傷一虜虜吹角大至
中矢死父柩旁至是皆旌之○追廢故少師大學士李東陽孫仲為中
書舍人以侍孝廟東宮講讀恩也○詔罷河間府通判周鈇寺職為民
奪吏部尚書許讚俸謫文選郎中鄭曉外補時吏部擬陞鈇為南京吏
部主事 上曰鈇外調未滿四月何以輒陞京職詔讚對狀仍令將今
年春旨謫降人數已未陞轉具查以聞于是鑽等上疏引罪并查已陞
轉官陳叔頤周卿吳會期陳冠林廷琛費元李汝楨高佐王一言李天
然楊佑劉昭文蔡襲咎如思洪廷桂李大魁等十六人未陞轉三十九
人列名具覆 上曰爾等職司銓任不以王言為大前所降黜皆因朝
祭失誤寺事朝廷薄戒警其怠玩乃未及一年遷轉數多擅權市恩欺
蔑國法殊失人臣體許讚等奪俸二月鄭曉降三級調外任周鈇併陳

叔頤等非假營求何以速進俱革為民尋降曉為和州同知○大同演
武廳火○直隸提學御史謝九儀覈奏順天寺學冒籍生員有罪逃回
者十四人逮治本無他故但冒籍者十三人削為民族屬頗遠至京未
久者十四人發原籍入學籍貫明白者一人肄業如故禮部因上言國
家開設賢科三年大比貢士禮部簡其賢者對制大廷以供中外百官
之任所係甚大夫人才之生其地者多寡不同故解額因之而異至於
會試則分為南北中卷取之各有定數所司不得增損奈何法久禁疎
遂有遊學矯詐之徒見他方解額稍多中式頗易往往假為流移冒籍
入試至有脫逃罪犯變易姓名奔走營求靡所不至至于會試舉人報
籍印卷亦有假託族屬改附籍貫以南作北國法固存士風大壞乞於
明年會試嚴加覈究但係先年冒籍曾經恩赦者許其首正其他籍貫
不明妄報中卷北卷者本部指名叅退仍行兩京各省凡遇鄉試開科

提學考選生儒不得將流移附籍之徒一槩濫收以玷科目違者奏請治罪○以水災免蘇松常鎮四府州縣稅糧有差○詔斬虜謀張尚仁等五人以徇陝西緝獲尚仁等令斬之仍傳首各邊鎮賜叅政謝蘭副使曹邁等銀幣○丁亥木星犯房宿北第一星○原任禮部尚書兼武英殿大學士冠帶間住夏言以元旦恭上起居命復舊銜致仕○詔改順天府治中嚴世蕃為尚寶少卿世蕃大學士嵩子嵩以治中臨民謂尚寶司為閒散乃言於上改之○命加賜朵顏寺衛都督革蘭台織金紵絲衣一襲綵段二表裏定為歲例先是革蘭台寺以進納藩衛之功上嘗優賜之命不為例台寺屢求添貢加賞至是准增歲例之賜貢額如舊戒毋煩擾○命查武學冒籍者盡罷黜之戒後有貢緣濫入者事覺重治不貸從兵部覆給事中陳棐奏也○詔發大倉銀八萬四千八百兩于遼東鎮修築邊垣

甲辰嘉靖二十三年

春正月庚子朔上不視朝○癸卯木土火三星聚于房○詔徵延綏遊兵赴戍大同先是延綏巡撫張聰上言備虜急務惟補足行伍充實芻糧訓練士卒鋒利器械修理城塹虜若入寇據險守隘使進不得攻散無所掠其勢自困邀而擊之此為上策若集兵防守不可為常請仍諭各鎮使互相傳告一聞有警本處兵馬作何戰守附近兵馬作何應援絕各鎮觀望之心杜彼此推託之念上納之至是宣大總督翟鵬以虜報紛至請徵諸鎮援兵聽用事下兵部尚書毛伯溫言審如鵬請盡掣全陝薊遼之兵獨守宣大山西不知各鎮有警何以待之且望援之心重則自勵之心輕惟延綏遊兵二枝可聽徵發上從部議○兵部尚書秦金卒謚端敏金無錫人歷事三朝老成練達有大臣風節時論許之○詔免查廠衛陞授官旗時總督東廠太監李寅請申明舊制

府察緝捕微勞乞恩免查以勵後效 上曰奏內緝獲妖言強盜陞授人員俱免行查既而管鎮撫司事指揮同知崔玉等亦疏請兵科給事中戴夢桂劾其效尤妄奏部議仍行科道官遵照前旨清查給事中楊上林御史沈越各會同查覈越因言廠衛類奏之弊率多含糊乞請朦朧擬陞連署姓名虛張勞勩奏一人則陞一人奏百人則陞百人遂使市井之流立登朝籍廝養之賤亦濫官班若止憑據倚據之詞不覈其實恐無功者多冒有功之賞今後請將廠衛人貢令兵部東廠會選才力堪充任使者二三百名分註五城如果東城擒獲西城不得牽以為說南城擒獲北城不得勦為已有所獲人犯果係機密重情有闕憲典者令送法司鞫明成獄給典緝捕人印信票帖抄招畧節候類奏陞賞之日執以查照若不係重大事情過為羅織許法司從公執奏照常發落庶事無遁情民無冤獄而牽附冒陞者不得以肆其奸疏入納之○

命工部造嘉靖通寶錢依洪武折二當三當五當十式各三萬文續貯庫○虜寇甘州土官百戶馬能言于總兵楊信以魯迷等國羈留進貢回夷九十餘人驅之禦虜寫亦阿力等九人死馬巡撫都御史詹榮以聞兵部言回夷絕強胡而附中國誠以恩寵相沿威靈足恃也楊信乃聽馬能之言無故驅以禦虜挑怨召魯實為罪魁都指揮黃騎柳楨等或不能阻執于前或不能應援于後均當責之于理 上命褫楊信職逮馬能等按其罪以寫亦阿力等死事可憫令撫臣重給棺斂祭葬之費送歸本國仍移檄國王宣諭朝廷處置罪人優恤無辜至意○總督宣大侍郎翟鵬疏請專命大臣督餉不從時兵部議兵食相須若分理之則督兵者務多調人馬不惜糜費督餉者務樽節錢糧罔中機宜事權不一掣肘難行宜將一切兵餉仍聽總督官督令撫臣召買毋得推諉誤事 上從部議○以宣府旱災命支京通二倉粟米十萬石運

懷來城給本鎮官軍○追贈故刑部右侍郎林鶚為刑部尚書謚恭肅
○涼州衛大火○命咸寧侯仇鸞掛印充總兵官鎮守甘肅等處○二
月巡撫河南都御史李宗樞請築黎城吾兒峪堡從之宗樞言山西黎
城境上有吾兒峪隘口初議築堡以居民阻撓而止因退築羅家郊臣
等以為是峪逼近故關連亘三省因舊增築據險防守誠不可緩築堡
完日即令吾谷關巡撫居內轄兵防守蓋自黎城抵故關有溝七十二
可為戰地羅家郊雖已修築然退入峪內二十餘里旁谿小徑尚或可
通終非久計尤必築垣於峪外則內而羅家郊外而同峪諸隘口皆保
障于中一遇有警發兵外守前以故關大溝為戰地中以吾兒峪為門
戶後以羅家郊為堂室重關疊峙不獨中土鞏固而北直隸山東亦有
賴矣兵部覆請 上命宗樞悉照原議併工修理為久遠之計○提督
鳳門等關無巡撫山西僉都御史李珏以病乞休許之命曾銑以原職

代○會試天下貢士命禮部尚書兼學士張潮右庶子江汝璧為考試
官取瞿景淳等三百二十人時潮入院疾作遂卒後以同考吳山補作
試錄後序先是南京御史包孝論劾翰林官袁煒潘仲駿童承叙稽世
臣郭希顏素干清議勿令再入禮闈禮部覆令各官痛自砥礪俟大計
裁處故諸臣皆不與分校○給事中楊上林等議上查革冗食言錦衣
衛南北鎮撫司象房額設見任管事俱有定員見今多溢原數兵部欲
將傳乞註擬管事者革去管事不為無據臣等請照舊制革回原衛所
司帶俸候缺推補請旨點用庶人人各以功能自奮御史沈越因言祖
宗朝非軍功不授以武職非異才不加以流官蓋酬功獎能振勵之微
權查得該部推用各都司及叅遊總兵等官雖憑保薦考語但亦有偶
叨一薦即授重銜及不勝任旋議罷黜則名器已褻臣願重惜此典不
輕授人比照武舉會議事例非有軍功大勞雖遇明恩不得實授庶懷

奇抱忠之士將脫穎而出又言武舉之設載在會典但直以拔之科目補塞一時彌文用舍或違其長遲遲視乎所進則新者未用舊者已湮大非朝廷選將掄才之至意乞勅該部將新舊武舉人負通行查出其年資才望尚堪策勵者酌量地方加以署職在內地者限以五年在邊境者限以三年若無功能即住支加俸不許指倚武舉名色朦朧奏用至於各邊替畫叅隨多係脂膩不諳韜鈴倚仗權門各送贊畫無事則庇占軍下靡費牢廩要挾主帥漁獵有司遇警則奉頭鼠竄膽氣索然傳人首級冒功乞賞此弊因襲已久乞勅兵部轉行撫鎮查覈有無指陳方畧建立軍功年終分別等第時議去留奏請庶諸邊鎮多自樹勞伐之士上俱嘉納章下所司○三月廷試賜秦鳴雷瞿景淳吳情等進士及第出身有差○詔革錦衣衛幫工軍餘先是掌錦衣衛事右都督陳寅請申明制典寬查革事上曰該衛既差役繫難免查但中間

工所費緣寄名及臨時添名者查明盡行革去給事中楊上林等因查錦衣衛軍餘丘敖等五千人託名幫工糜費餼廩言丘敖等各役見於正德二年投充十六年奉例本革所謂丘敖姓名乃正德間投充故名也嘉靖七年李學等因之而奏復一千一百三十名後王允中等沿之而奏復三千八百七十名大率群小無知公肆欺冒始假營操之故繫踪跡於行間繼託幫役之謀寄姓名於工所中間假張認李援午成牛因影索形乘虛作實踵為故習蠶食日深國用日耗若不盡革此輩冗食何時已哉御史沈越亦言錦衣官校軍旗原係侍衛直駕爪牙桓赫既參擁伏之班則宿衛勤能不在荷鋤之役不知當事之臣何人創為幫工之說使游惰之人環聚而耗公廩况朝廷工役不常國家財賦有限若必豫養軍人以俟興作則所費不貲故豫養十人則歲費糧百二十石豫養百人則歲費糧千二百石養愈多耗愈甚今日丘敖等三千

八百七十名李學等一千一百三十名皆所以耗國家之財者也臣愚以為養軍以待役不如因役以募民養以待役則費出無窮役以募民則用節有限昔太王作室馨鼓弗勝文王為臺庶民胥悅况郊廟大役不止臺室皇仁招徠何患無人若丘敖等誠無所用之第恐踵累年奏復之非倡一槩溷革之說籍口廟建托以求容是又啟一冗食之圃也伏乞上裁 上令再假幫工希求恩澤者即奏聞重治著為令越又言內府各監局今查見在食糧新舊軍匠計二萬五千二百五十八名每名監局多者數過三千少者不下數百率多假公廩以獵班錢役私門而恣影射或營冊開逃仍造食糧或令收今除任意冒濫或已經事故不行開除或不由驗送私自僉補或解到戶丁不行掣回新匠或食糧有名局監無人甚者名在六府不能飭八材藉系百工不能通世業操縵而嬉者什九餼廩稱事者什一私得其益公費其財且前項人役或

以局監寫字刊書或以粧鑿搭採或以挽花製燈或以行造金銀或以製合火藥即其所挾類皆技藝微勞平日食糧克直宜若無可擬陞者然而傳陞例陞工完而陞附名各工而陞又有不開原由朦朧而陞者故其官為皮作局文思院營繕所副使大則亦為光祿監事順天知事上林苑監丞者群小冒竊以為當然且謂朝廷名器可謀而獲不知欺天罔上法典不容從而遂之竊恐後之人有以議賞罰也伏乞令臣等照欵裁革可省國家之耗費以副皇上惓惓憂民裕國節用惜財至念上從之○夏四月戶科給事中戴夢桂疏陳禦守之策條五事以上曰量徵調以備折衝寬法制以便間牒擬胡服以備掩襲懲規避以聖戰守廣推擇以備將選下部議覆 上曰所言既為禦守奇策務實舉行○詔禮部重議廟建時左庶子江汝璧上九廟世室圖言成祖首正世室而奉皇考入廟則見存舊廟宜遷于穆廟之首以當將來世室與

成祖廟東西對峙太祖廟乎其中祧廟奠乎其後三昭三穆列乎其前成廟睿廟翼乎其左右疏入 上悅下部議時太廟同堂異室准復舊制禮部尚書張壁議定工部尚書甘為霖已奉行營建汝壁議下俱停工以待既而右贊善郭希顏言宜立太廟居中世室居左而虛右四親廟以次而左右祧廟居後亦下部議禮部遂言汝壁之議間有異同然其說出于朱熹廟議之圖希顏之議本于韋玄成此不待智者而後知其不可也惟仍舊制則名正言順足以垂憲萬世視損七廟而為五廟孰為當耶蓋禮官因 上悅汝壁議難于題覆故嗾希顏為此議以亂之並罷前議也○五月諭令各省守巡官徧歷所部時給事中何光裕言各省守巡俱有地方之責雖偏州下邑亦必躬親徧歷察吏治闔城也查錢糧理罪囚治奸豪恤孤寡督稅糧審徭役諸所應舉職務俱照憲綱事體施行不職者聽撫按奏 上詔從之○番夷作亂時甘肅

近邊各種番夷糾眾攻劫並塞殺掠人畜據險抗敵巡撫詹榮上言欲乘時追勦以禦克悍除民害而總督張璠上言欲宣布恩威待時戡定事下兵部議尚書毛伯溫言番夷梗化實切腹心急之則驚變緩之則滋蔓宜治具陳兵固守地方仍遣人宣布威德陳示禍福令知悔禍獻首惡以贖罪如怙終負固定宜追勦不得互為異同以致失誤 上從部議○給事中楊上林御史沈越奏繳清查冗食文冊查過例應裁革皇親指揮使等官七十一員錦衣并旗守等七十七衛所例應減革改正替職等項官旗指揮使等三千六百五十員名查革過錦衣左等所鑾輿等司幫工軍餘五千名時冗濫一清而裁革票擬實出大學士翟鑾于是中貴戚畹怨鑾者益眾而有一鑾當道雙鳳齊鳴之謠云○六月熒惑犯南斗○大學士方獻夫卒謚文襄獻夫南海人立朝議論恒存平恕人以此多之○詔罷右贊善浦應麒削籍先是應麒主順天卿

試受賂取馬鑾等鑾為代筆生負需索東廠緝捕之給事中呂時中劾
應麒罷之併馬鑾俱革為民○巡視京營御史沈越疏請沙汰老羸并
冒濫軍士言臣被命以來逐一查閱營衛情弊聞見頗悉夫國衛于兵
兵資于食京營之兵所賴以振揚威武控內禦外故轉天下之粟以供
之嚴輸力輓重費而不辭者所倚甚重故也使其替補法嚴訓練精密
則兵威自壯糧費不虛若老弱冒濫之徒雜處行伍虛糜無益豈國家
養兵儲用之初意哉但今邊右有事團營居重馭輕不可無通融作新
之道乞勅兵部再加詳議將臣所擬應革軍人斟酌以請 上納之○
秋七月加禮部尚書陶仲文少傅兼少保支正一品俸○戶部尚書李
廷相卒謚文敏○八月內苑嘉禾生一莖雙穗者六十有四零壇靈黍
五出者一○詔罷大學士翟鑾削籍逮繫少詹事江汝璧等訊治時給
事中王交王堯日論劾汝璧及修撰沈坤編修彭鳳歐陽喚員外高節

朋私通賄大壞制科大學士翟鑾以內閣首臣二子汝儉汝孝聯中鄉
會而業師崔奇勳姻親焦清入試既同一號座主皆出彭鳳其歐陽喚
亦汝儉舊師故改閱書經跡若引燻而陰為籌畫及沈坤之取陸燾高
節之取彭謙汪一中皆以賄賂故乞明正其罪且欲追論順天鄉試秦
鳴夏浦應麒阿奉翟鑾之罪 上令部院從公叅看鑾上疏辯因請乘
試 上曰鑾既聽叅更辯擾耶內苑乘輿入閣大晏二子縱有軼轍之
才豈得明白濫進遂令鑾削籍為民并汝儉汝孝焦清等俱除名下汝
璧等于錦衣獄及法司鞫問謂汝璧鳴夏應麒雖阿取輔臣之子然實
非以賄故至坤亦然獨謙以得罪執政誣以賄 上詔杖汝璧等革職
間住節克軍謙為民坤一中煒姑留供職因詔逮繫監試御史王珩沈
越謫補外先是江汝璧奏辯言臣為考官時在內有給事中盧勳周家
陳棐為同考試官在外有御史王珩沈越為監試官此五臣皆陛下除

奸革弊之人臣若有此情當時豈得不言 上曰盧勳等職係言官目見場中情弊如何不行糾奏因令勳等對狀勳案罪乞恩認罪命降俸三級以珩越強辯命逮繫錦衣衛謫珩判滁州越判開州時擬降調出刑部尚書聞淵都御史熊浹以為太過淵因連揖謝之蓋淵有所為希執政意也○進大學士嚴嵩少傳兼太子太傅○九月以少保兼太子太傅吏部尚書許讚為文淵閣大學士禮部尚書兼翰林學士張璧為東閣大學士並叅贊機務○以熊浹為吏部尚書費采為禮部尚書○巡撫兩廣都御史兼兵部尚書潘鑑卒謚康敏○虜入大同塞總督尚書翟鵬禦却之○進巡撫僉都御史許論副都御史尋乞休許之以朱方為巡撫薊州都御史時有叛人白通事孛顏酋侵薊州塞論伏兵擒通事斬之乃進論副都御史論尋請告去以朱方代之○詔撤諸鎮防秋兵時虜酋遣我叛人至京師入兵仗戶部習發佛郎機大礮獲而誅

之朱方遂請撤薊鎮兵下兵部議尚書毛伯溫言諸鎮兵俱宜撤從之○冬十月虜入寇初寇膳房堡總兵邵永禦之不能入遂自萬全右衛壞垣擁入 上以本鎮防禦不嚴切責總督尚書翟鵬等仍令東西廳整棚士馬候報征之既而虜報沓至京師戒嚴兵部尚書毛伯溫成國公朱希忠給事中戴夢桂御史楊本源及山西巡撫魯銑等各議防守事宜 上令兵部檄二鎮士馬急赴畿輔覘虜隨往分布截殺勦擒之○虜破宣府塞詔逮繫總督尚書翟鵬及巡撫都御史朱方等訊治兵部尚書毛伯溫罷時虜破宣府入紫荆關給事中戴夢桂言薊州巡撫朱方輕躁建議撤兵太早藉口惜費致虜得乘間入寇王儀卻永一聞其議遂即散兵虜一入口召兵不暇總督翟鵬漫無可否亦難辭罪上曰鵬若不下令儀永安敢撤兵朱方建議撤兵使既去之賊非時勾入以必搶京師為辭二臣實為罪首俱命械繫來京訊治儀永姑奪俸

戴罪殺賊御史舒汀因言撤兵致寇雖自朱方而本兵毛伯温職方郎中韓勛漫無參酌朦朧題覆罪不容辭况朱方止議撤薊鎮兵而并將宣大兵並撤則本兵之罪也 上是其言令奪伯温官為民而杖韓勛於關廷遂卒既而逮繫鵬方至俱論戍邊鵬至河西務借宿民家皆莫肯留鈔關主事因杖其居民民訴之廠衛以聞復逮至京遂卒于獄方亦斃杖下乃以翁萬達總督宣大軍務○十一月虜寇甘肅總兵仇鸞總督張珩巡撫趙錦等禦却之○南京兵部尚書張邦奇卒謚文定邦奇鄞縣人好學篤行以母老屢進屢乞休累官尚書年六十餘而其母尚存至百歲而卒人稱其孝養所致云○吏部右侍郎歐陽鐸卒謚恭簡鐸泰和人有文學操履修潔士論重之○詔加秉一真人禮部尚書陶仲文少師其少傅少保如故時有大同順聖川水地莊卒劉伏玘擒板不孩部下首目王三三本華人叛附虜者磔之傳首諸邊 上曰朕

祇奉玄威保民伐逆仰上天垂鑒叛惡生擒固義勇之効力實鬼神默戮其魄也遣告謝郊廟社稷加仲文少師餘官如故

謹按鄭端簡曉曰我朝開國靖難勲戚內閣五楊吏宰三王皆未有兼總三孤者仲文獨以真人躋宗伯領三孤云

兵科給事中徐養正疏陳團營事宜從之養正言今之團營即古天子之六軍也當戎務廢弛之久而欲錢糧支給宜禁止浸漁以革夙弊馬匹領養則棟選壯軍以便飼餼給發弓矢器械以熟操練分別軍士強弱以作勇敢疏入詔議行之○十二月以戴金為兵部尚書金因條上備邊十二事曰別武才以責成效稽分領以別勤惰實缺伍以備攻守選民兵以裨行陣脩戰車以禦勅敵撥富厚以養馬匹脩關隘以固藩屏重墩臺以明烽火謹盤詰以杜奸細處降人以收亡叛養死士以探虜情選土兵以備調度 上令斟酌舉行○詔禮官議大臣祭葬贈謚

時禮科給事中周宗上言祭葬贈謚宜著為畫一之法因下部議尚書費家等議以為國家定制優卹臣工計品論資以為隆殺則辨貴之義存而賤者勸程工課實以為予奪則辨勞之議存而怠者奮祭葬有半得則辨賢之義存而不肖者懲雜途不得以干恩父母不得以追附則辨能辨位之義存而覬踰者息規制非不甚備而歲久因循越且濫矣臣等擬議條格如言侍臣者必嘗日侍講讀言軍功者必嘗躬履行陣給半葬者必原其年勞之異用請特恩者必論其途徑之正邪於例不可拘法當報罷者條列上請以俟裁定一二品官妻授封病故者止祭一壇不得與夫之父母比三品四品父母止授封五品以下封者不賜祭其稱特恩非日侍講讀親履行陣及東宮官親奉出閣開陳有勞者不得驟與一切雜途皆報罷尚書左右都御史已加三少而奉旨革去者止與本等祭二壇被劾間住者不許四品以上父母曾經本等封贈

者各許並祭無封贈者不許二品文官妻未封夫人者不賜祭被劾致仕者聽本部論其生平功過酌議請裁未考滿者不分在任致賜俱賜祭一壇葬減半聽調別用及間住詔復者俱不許四品官已考滿者父母雖不得重封亦與祭一壇未考滿者不許議上 上命被劾致仕者仍如弘治中例准給祭葬以稱朝廷優禮大臣之意餘皆如議○命刊醫方纂要及外科經驗方 上諭禮部皇考躬集醫方選要仰體天地生德壽眾至仁之心歲久傳有未廣即重錄梓行以濟民生皇考御製外科集驗方一併重刊之○副都御史萬鏜平湖貴苗班師初鏜受命徵兵討湖貴苗不克有言鎮溪土指揮田應朝為諸苗所信服足辦此事鏜用為巡捕指揮應朝故辰州府學生負巧黠多智術能誘煽諸苗往年永順保靖相仇殺皆應朝陰構亂而兩利其賄及得巡捕益煽惑群苗大肆奸利征則在真寇誘殺居民冒功賞撫則挾求重貲多反覆

苗實未蒙惠利故功久不成鎧遣人誘苗帥龍來見苗謂必得質始出鎧令一千戶入質龍果來鎧執而奏殺之苗亦殺其所質千戶鎧乃厚恤千戶家復遣兩省諸監司挾所隸土官親詣賊巢招撫犒以花紅牛酒給魚鹽又計口給糧食官其魁龍許保湖苗暫息貴州苗尚觀望未肯靖鎧遂奏苗平請班師許之朝廷各論功陞賞召鎧還為兵部侍郎未幾龍許保吳黑苗復倡亂焚劫州縣兩省無寧日

乙巳嘉靖二十四年

春正月乙未朔○史館以所重錄諸書成進呈先是 上命錄列聖御製文集并聖學心法四書五經大全及性理二十一史諸書至是俱完奏聞進覽乃賞賚總裁等官有差○閏正月論甘肅平虜功加總兵咸寧侯仇鸞及總督侍郎張珩官時鸞上平虜功言日者聞虜入寇督兵出禦追至朵蘭地及之一日凡五捷斬虜首百餘級并斬吉囊子狼台

吉且謂為擒獲虜王又將昆季廝養卒姓名竄入籍中俱稱有工事下部覆言鸞奏捷辭多虛構意涉誇張計璇璣望日仲冬晷極短朝夕才五時耳質明聞警發兵追躡至沙河大途又至朵蘭雙莊軍行不啻二時乃于三時間五戰五捷得首功百級何雄速如此且往歲大同黑山之捷謂馘吉囊子太不孩竟成空言今復以衣鎧鮮華謂為狼台吉濫引擒王之語妄意封侯之勲不知果何所據且又竄昆季廝養姓名謂破陣當先俱屬可疑宜行勘覈覆奏 上曰斬獲既多厥功可嘉其加鸞太子太保任一子所鎮撫張珩進右都御史其諸功次令巡撫官覆覈以聞○戊寅金星晝見○詔中外嚴禁侈靡時禮科給事中查秉彝上言風俗浸侈始于世祿之家好作無益崇尚虛靡以蕩民心四方無藉之徒聚黨遊食以愚黔首誠敦倫圮教之端敦奸誨淫之地臣竊以為欲天下太平在息盜賊欲息盜賊在保善良欲保善良在明禮制禮

制明則人知節儉節儉則無求無求則廉耻立而禮義心生奸盜原塞
疏入 上詔中外嚴為之禁○巡按山西御史陳豪疏請擊逐套虜言
北虜三犯山西殺掠百萬此不可以常寇目計費帑金六百萬而戰守
無尺寸功不知何用此六百萬費為諸臣建議動稱屯守不知虜衆內
侵不由諸隘口皆猿攀絕壁蟻附懸崖邊垣又何足恃况諸鎮烽火皆
媒虜自為多囊鉞刀遇虜偵者賂求不殺彼此譯語互為和同待虜深
入然後舉燧發礮降喉轉走蓋不止一日一處為爾且邇來之虜類多
我民亡命為彼嚮導星術機械文字技藝諸人咸足為彼區畫故連歲
非時倏至冒險深入如履故途無復忌憚自今以後恐患無底止乞下
廷臣集議萬全之策期于必戰盡復套地庶可弭其內擾之患而邊境
無虞章下兵部議行○兵部尚書戴金罷以唐龍為兵部尚書○命施
藥於朝天宮 上諭掌詹事府事 文部侍郎孫承恩錦衣衛指揮使

陸炳曰方此春時民多疾疫朕體上天好生之命令爾等施藥於朝天
宮用以溥濟群生宜如諭行既而承恩奏邊方軍民亦宜救療乃復命
錦衣千戶同道錄司官齎赴宣大山西等處會同撫按官立法給散務
俾均霑玄惠以廣同仁之義○命兵部右侍郎路迎無貪都御史往修
築紫荆諸關初兵部尚書戴金言紫荆密雲係國門之藩屏而宣大偏
關又為紫荆密雲之捍衛蓋添設重關以限制夷虜若假以人力脩補
必成不可犯之險乞勅一重臣親往紫荆等處相視關隘亟為脩築其
宜大偏關亦勅總督侍郎翁萬達議處具聞至是乃命迎往○總督漕
運右都御史王暉疏請留漕運折糧銀數萬兩賑廬鳳滁和被災之地
戶部覆漕糧為京儲重計難以議留聽以所給兩淮餘鹽銀賑濟得旨
允行○命續纂大明會典大學士嚴嵩等請續纂大明會典除先年纂
輯已完外自今嘉靖八年至二十三年止一應事宜照前凡例續收附

入以成全書報可乃命大學士嚴嵩許讚張壁為總裁官吏部侍郎兼
學士孫承恩張治副之○二月賜致仕吏部尚書羅欽順羊酒命撫按
官及門存問仍給月米歲夫欽順年八十巡撫張岳為之請故有是命
○詔天下有司招撫流移復業給與牛具種子俟年豐抵還有能開墾
閒田者蠲賦十年從山東巡按劉廷儀奏也○吏科給事中盧勳等陳
慎考察四事一集眾見以昭大公通行兩京堂上官將所屬各官用心
稽訪備書事蹟俟會考日親携赴部以憑參酌去留一核眾職以昭大
法謂於欽天監大醫院一體考察以清冒濫一除曖昧以全人材止據
居官操行之事嚴加考覈其未任之前及閨門曖昧之事一切弗聽一
禁奔競以正士風各官果有附勢依權實錄鑽刺者照不謹事例黜退
毋容倖免得旨太醫院官照例考覈欽天監已之餘令部院如議行○
總督直隸河南山東兵部侍郎張漢條陳備邊四事納之漢言虜不畏

吾地險而所畏者將勇不畏吾卒眾而所畏者兵精兵精本于賞罰之
當因陳選將練兵信賞必罰四事之宜疏下部議俱依擬行○命罷元
主忽必烈廟祀及其侑享五臣時禮科給事中陳棐言元世祖以夷亂
華不宜廟祀乞撤帝王廟元主忽必烈神位及其臣木華黎等五人牌
名并南京廟祀胡像禮部議覆從之于是削宋訥所撰廟碑命輔臣別
為文記之○三月大計京官黜南京考功郎中薛應旂外補初大學士
嵩入內閣南京給事中王燁首劾嵩奸貪嗣是論者紛紛嵩憾燁不已
及是大計京官嵩令所私尚寶丞諸傑貽書應旂使黜燁應旂執傑使
及書擬奏為尚書張潤所阻而傑先為南京兵部主事時以貪聞于是
尚書潤及都御史王以旂令應旂并傑出之又黜前南京御史出守常
州符驗等嵩乃嗾同鄉御史桂榮劾應旂以私怨黜本郡守遂黜應旂
補外職○詔收原賜勲戚旅舍初福德寺五旅舍寶源吉慶二旅舍皆

先朝所賜勲戚者至是 上降旨曰先朝之賜原非子孫世有俱令還官徵賦以資國用命順天府丞一人督理之○夏四月詔申飭諸司賑卹戶部尚書王杲上言邇來各處災傷業已奏請蠲恤第諸司多玩愒虛飾民不受惠臣以為守令乃親民之官守令得人民受其福乘今賑恤之時所在撫按加意督成成果能先事儲蓄及時賑貸全活衆多者奏薦陞擢其或廢職誤事叅劾斥治庶貪殘有警疲困少蘇 上令依擬行○五月壬戌朔日食○楚世子英燿弑其父楚王顯榕英燿伏誅先是英燿淫縱不道奸宮人方三楚王錮三而杖殺其使陶元後以端午設宴樂婦宋么兒侑觴英燿復納之王怒欲杖殺狎邪劉金金大恐乃與其黨嗾英燿先發謀以上元舉事軟血盟分執木梃銅瓜伏堂後以舉砲為號申刻王至與武岡王飲尋欵於西室從者各就食英燿舉手發砲衆從王後出謝六首以銅瓜搗王腦碎各亂挺捶之立死猶鞭屍

以洩忿昇入內寢翼日殮用長史承奉等謀以中風報訃而錮武岡王於別室王從者挾門出告變鎮撫官以聞 上詔司禮太監駙馬都尉等官會鎮巡鞠之武岡乘間揭英燿弑逆狀獄具 上命成國公朱希忠祭告皇祖斬英燿于市焚屍揚灰勿令收瘞凡預謀者悉盡磔之仍書諭各王府○六月大學士毛紀卒贈太保謚文簡紀掖縣人受遺迎上入繼大統歷事四朝守正不阿以疾乞休家居二十載始終一節先是詔有司存問及是聞卒輟朝一日○秋七月太廟成奉安列聖神主于太廟布詔天下 上以廟建禮成於奉天門受文武百官上表稱賀乃頒詔天下詔曰朕惟宗廟之禮所以序昭穆孝子之至莫大乎尊親我國家宗廟之制自太祖肇基首立四親廟其後更制同堂異室比因稽古式師周典奉太祖正位居尊成祖及列聖與我睿宗皇考武宗皇兄俱同堂而序享獻之節茲以七月初一日奉安神主聖靈攸妥朕

志少伸布告天下咸使聞知○命加大學士嚴嵩太子太師許讚少傅張璧太子太保工部尚書甘為霖少保兵部尚書唐龍禮部尚書費家俱太子太保賞廟建功也○詔逮繫御史周冕于獄初禮部尚書費家等奏言太廟告成宜舉告廟禮 上命皇太子攝行祀禮冕上言數年來祭列聖於景神殿聖心弗安今大工告成廟貌鼎新祖宗列聖得復其位睿宗又與列聖合享一堂非陛下之誠孝無以妥其靈通其志宜于奉安之日或秋祭之期齋祓一心親致孝享上以對越祖考下以儀刑百辟庶神人胥悅休徵協應不宜代攝以缺神人之望疏入 上怒冕故抗明旨逮獄鞫訊謫遠方○擢岳州知府陸垵為鴻臚寺卿時巡按湖廣御史伊敏生薦垵救荒有善政且慈惠清謹淳德篤行持身如處女愛民如已子庶幾古之循良故特旨擢之○西海虜酋整克納欵求附初整克乃北虜小十王部落因變逃據西海已乂至是遣其屬阿

都赤赴甘肅納欵求居內地總督尚書張珩上言整克精兵十萬若不
得請必為套虜所吞是藉寇兵也納之便但虜情詭詐難信宜令整克
親赴軍門覆審無異然後俯從其請仍令海上任牧如故俟套虜入寇
即于境外拒戰有功一體給賞或計擒酋首朝廷待以不次之典既以
羈縻西虜又借其力以捍禦套虜計無便于此者 上命相機酌處仍
整搦士馬嚴加防守勿墮奸計○詔逮繫總督尚書張珩巡撫延綏都
御史張子立于獄謫戍邊時套虜二萬餘入榆林塞殺掠人畜數十萬
計延綏遊兵時俱徵赴宜大防秋故虜入無復禦者其禍最慘乃逮繫
珩子立詔獄訊治戍邊○八月加秉一真人陶仲文伯爵辭請贈廕
上許之追贈三代給與誥命廕其孫做為國子生○晉府永和王知燠
獲白兔以進賀萬壽節 上喜而嘉獎之○詔釋御史楊爵給事中周
怡于獄尋復逮繫楊爵初爵與怡先後繫錦衣獄至是命釋之赦其罪

放田原籍大學士嚴嵩以工部郎中楊魁與爵等事體相同乞一體寬宥 上並赦之既而復逮繫爵○諭立京城義塚時 上諭禮部曰朕思京城九門地大人衆多有死喪貧難不能葬者或有四方客死不能歸者暴露屍骸朕甚憫焉五城御史其督率各該官役以義地收瘞之○虜寇大同塞叅將張鳳生員王邦直赴戰死之時虜以數萬騎犯大同中路鐵裏關等處總兵張達率衆力戰却之又犯鵝鶻峪叅將張鳳率其屬各殊死戰鳳挺身陷陣中流矢先死餘衆盡歿磁州生員王邦直初以武力之士應詔至是見虜勢亦慮衆寡不敵守者促之且激曰若素以勇聞奈何見賊不殺邦直耻之遂大呼入虜陣虜皆辟易見其兵少無繼援遂聚而圍之邦直奮勇獨殺十數人力竭而死虜乘勝欲深入總督翁萬達總兵周尚文各遣騎四出邀虜虜登山望見官兵大集乃遁出閔事聞 上嘉萬達等功各賞銀幣仍賜勅褒獎復陣亡總

兵張鳳原官贈邦直都指揮僉事各廕一子世襲千戶○詔陞河南歸德州為府增設附郭縣為商丘割睢州及考城柘城二縣隸之其原轄寧夏鹿邑虞城永城如故從撫按官奏也○命成都府祀漢廉范宋崔與之於四賢祠巡撫都御史王大用奏請故有是命○遷揚州府海門縣於直隸金沙場割通州清幹鄉七圖及利河鎮北水蕩附之避水患也○大學士嚴嵩請親行大享禮報聞先是大享殿工程將竣禮部尚書費案言大享殿三字原係欽定請書扁額 上定門名大享殿名皇乾案又言自古圜丘事天明堂事帝其禮一也惟事天之禮極簡聖人以為未足以盡其意故有秋季大享之禮仰惟皇上憲天稽古達孝因心茲當郊廟禮成之後準古明堂之制肇建大享殿皇乾殿今工完在即秋享上帝以睿宗獻皇帝配典禮隆重群臣宜上表賀及詔告天下并書諭宗藩上令暫止至是嵩上言皇上嘉尚古禮取法成周明堂嚴

配之文奉皇考以配上帝尊親大孝千古帝王莫及此典往年推行於
 玄極寶殿茲則鴻構落成首舉此祭人心咸望乘輿一出躬舉大儀以
 光聖孝蓋昨者太廟新成群臣已切維時溽暑未敢輒請茲天眷聖躬
 充養健盛臣敢批瀝愚衷乞賜鑒納尋定大享以九月四日暫于玄極
 寶殿行禮各項禮儀俱俟來秋定行○詔定陵祭遣官以英國公張溶
 京山侯崔元西寧侯宋良臣安平侯方銳駙馬都尉鄔景和謝詔長寧
 伯周大經王田伯蔣榮惠安伯張鏞都督沈至王朝用更番行禮○遼
 東廣寧衛直隸龍門衛俱地震有聲○建州右衛夷酋李撒赤哈糾眾
 為亂屢犯城堡邊人患之至是就擒命斬首梟示賞總兵官趙國忠巡
 撫山東都御史董珊等銀幣有差○九月大壩馬房草場火逮問戶部
 主事趙玠等尋贖罪還職○詔謁祀諸陵官不許託故代行者御史黃如
 桂言朝廷歲以春秋二季遣官謁祀諸陵禮典甚重比者人情玩愒各

衙門司務得以代堂上辦事進士得以代各司甚非所以奉宣聖孝恭
 迓列聖之意宜禁之得旨自今陵祭如有託故代行者科道指名奏
 ○擢吏部文選郎中劉塾為右通政提督騰黃詔于各部司屬內選有
 才望者為文選郎中務在得人毋循次調補既而禮部尚書費宋言比
 者選司負缺吏部奉旨從各部推用臣之所屬有儀制祠祭二司事任
 最重而郎中周琬高簡最各稱職該部方賴其用有如忌臣者出臣不
 意議調琬等成命一下臣欲疏留不可得矣近評事孫學思假以大學
 士嚴嵩之名求索差遣臣執不與學思為嵩私人最多機警第恐萋菲
 中傷夫以臣孤危而復奪此二臣再遭謗訕愈難獨立 上曰宋意在
 攻訐假以保留屬官為詞妄生攪擾下其章所司○乘一直人領道教
 事陶仲文奏詣太和山建醮祝延聖壽 上允其請賜勅給驛以行○
 詔復以四孟朔日時享太廟○詔奪吏部尚書熊浹等俸先是部擬刑

部郎中翁大立調補文選吏科都給事中楊上林劾論大立傾險不職
宜罷有旨令吏部對狀于是決等謝罪 上曰爾等職司用人乃不行
審察選用失當以致人言令奪決等俸三月大立不准調用○法司上
是歲重囚應決之數 上曰囚犯屢歲廢刑即當處決但朕方奉欽天
報祖吉典姑停行刑令嚴錮毋縱○巡撫鳳陽都御史王暉請贖海州
民馬課先是海州災傷有詔贖民當出馬者徵其值二年及是限滿暉
上言海州地小民急逃亡過半請以前所贖者永著為令兵部覆請再
贖五年以示寬恤從之○詔建橋於琉璃河工部尚書甘為霖以財力
不支請行開納事例通查各省無礙官銀及變買大興隆寺基銀一體
解赴工所 上允之付所司議處乃命鑄總視工程關防給為霖鑄管
理工程關防給工部郎中劉勳既而復發內帑銀五萬兩助濟橋工○
乘一真人陶仲文于原籍黃州造雷壇并御書樓成疏乞坊額 上賜

名隆教坊令工部製扁給之○詔改徵被災地方折色○大學士張璧
卒贈少保謚文簡壁石首人醇實周慎在講筵最久多所裨益可稱○
召起原任大學士夏言于家 上遣官賜勅令馳驛前來以副眷倚至
意○冬十月皇太子千秋節賜百官宴于午門外先是詹事孫承恩等
言邇者皇上以皇太子冠讀且近習禮禁中固慎重典禮至意臣惟近
侍左右朝夕與居易于玩狎不可不慎惟皇上有君之尊有父之親誠
進皇太子于前躬為肄習賜以面諭况聖德之至一言一動莫非觀法
尤易速化至近侍諸臣又勅諭之俾各事以正道使俚言褻語不入于
耳戲侮玩好不接于目斯可端皇太子蒙養之功副皇上佑啟之意
上納之○大學士許讚罷時讚引疾乞致仕 上怒令削籍為民○追
錄許達樂陵禦寇功巡按山東御史鄭芸上言正德間劇賊劉六等糾
眾抄掠所至縣官望風奔潰獨樂陵縣知縣許達鼓策巷戰保障有功

後以死宸濠難廢于瑒錦衣千戶頃見浙江叅議周期雍以擒礦賊功
得廢一子入監達功不在期雍下乃僅錄其江西死事之功而樂陵功
猶未錄似為缺典下兵部議進瑒官一級從之乃以錦衣千戶許瑒為
指揮僉事○十一月纂修王牒成○詔廣東守臣為副使陶成并其子
左布政陶魯立祠于會城歲時致祭成廣西鬱林人初任浙江僉事正
德間征處州叛賊以功進副使既而為賊所獲死之後遣官諭祭贈祭
政民德其保障功立祠以祀魯以父廢為新會縣丞與征兩廣洞蠻忠
勇有父風累進湖廣布政諸蠻深讎之乃掘其祖墳戕其宗黨魯卒于
官其子孫不敢歸鬱林遂占籍南海至是成曾孫陶鳳像具疏上請
上乃命建祠祀之○詔罷吏部尚書熊浹削籍為民先是浹諫止仙箕
上批浹疏以示大學士嚴嵩言浹非敢沮訕意以仙箕之降民間
多有恐後不驗有負皇土崇奉之意 上切責嵩為浹強解嵩引罪乃

釋及予陶仲文恩廢又上疏力關異端留中不報 上屢以事督過奪
俸者再浹不自安至是稱病乞休 上大怒曰熊浹前比張孚敬議禮
藉以干進姑不追治令錦衣官校監送原籍為民庸調勿復○太常卿
魏校卒校崑山人有異質能通諸家言折衷于六經言動以禮近世稱
為儒宗○詔改兵部尚書唐龍為吏部尚書以路迎為兵部尚書○十
二月夏言至京令復入內閣初召言命至門下士有勸言勿出者言不
聽竟出應召○兵部尚書劉天和卒贈少保謚莊襄天和麻城人字度
弘亮有泛應才始為御史以法裁太監廖堂詔獄謫金壇縣丞後巡撫
陝西造輕車疆弩總理河道手製乘沙量水諸器後人多遵用之○詔
進大學士嚴嵩少師○日有黑氣相盪時自二十日至二十六日日輪
外有黑氣如盤與日光摩盪○詔濬南京後湖

丙午嘉靖二十五年

春正月己未朔 上行拜天禮於玄極殿出御奉天殿受賀○群臣表賀瑞雪時 上方禱雪元旦雪降輔臣率眾上表稱賀 上曰時正履端仰荷天眷瑞雪應禱朕心感荷覽奏已知○二月總督宣大翁萬達請調各鎮客兵聽用從之萬達奏言吉囊子住牧河西俺荅阿不孩引兵渡河乞如例調發客兵其河南山東民兵無益于用獨可調山東長鎗手三千事下兵部尚書路迎等上言前年戰黃土溝虜既南下而北走去年戰陽和川虜亦深入而宵遁多客兵之力若山東長鎗手河南毛葫蘆本非民間常徭為其長于用鎗善于走山所司顧募以資保障第每省至六千名不無克以老弱今宜減半務選精壯以一都司統之取便住劄候警赴援仍調延綏遊兵二枝寧夏固原遼東遊兵一枝務足三千人以五月初旬各赴宣大軍門聽候調用 上從部議○南京龍江右衛指揮僉事蕭勇以祖籍永平乞改調 上問兵部改調事列

自何時始可復行否兵部上言會典京衛武職聽調外洪武三十五年著為令然曩者在內官衆則可耳今官益少如許之則規避者紛然起上是其言令自今求外調者勿聽○以通倉粟米匱乏詔京衛官軍月糧改給京食粳米不為例○貴州巡撫都御史劉渠請增守備言雲南界中曲靖之東為烏撒道里綿遠夷醜狼扈已就彼議建哨堡撥軍防禦蓋緣設無專官事難責成請增守備一人于迤東一路以無制之詔從其議○吏科都給事中楊上林等連疏請錄用遺逸 上命吏部擇才果堪用者詳具履歷以聞于是吏部疏奏原任工部尚書章拯兵部侍郎劉源清等三十人 上以拯等俱先年黜當其罪而無罪者又年老非才報罷○陝西花馬池舊草場火奪寧夏副總兵王振及分巡寧夏僉事王朝相俸三月仍計所燬草數責振等償之○光祿卿孫禴上言供應器皿已充乞暫免一年燒造以寬民力報可○裁革揚州朝宗

二關從漕運都御史王暉奏也○衍聖公孔聞韶卒賜祭葬如例詔子貞幹襲爵○增設鎮戍助馬二堡守備官總督宣大侍郎翁萬達等言大同迤北二邊西自大同左衛馬頭山起東至陽和柳溝門止創鎮羌助馬二堡乞設官兵防禦部議從之○詔賜大學士嚴嵩祖嚴驥祭先是嵩疏稱祖塋被水衝噬乞容男世蕃給假遷葬上許之仍命禮官議恤典至是議請得旨嚴嵩輔政有年勤勞素著伊祖嚴驥令工部差官營葬賜祭二壇不為例○賜韓王融燧皇明祖訓皇明典禮洪武禮制各一部從其請也○增設甘肅鎮高臺千戶所儒學掣回寄名甘肅生員實之以巡撫傅鳳翔議故有是命○四川白草番為亂攻陷平番堡及真酒關虜把總丘仁殺百戶耿爵流劫村寨給事中扈永通劾奏副總兵高岡鳳昏庸不可用都御史王大用惟務裁節誤撤藩籬所減才萬之一而喪失無算皆當罷黜刑科給事中諸葛峴因言何卿沈

希儀皆川廣良將可代 上用兵部議罷大用岡鳳嚴飭守土諸臣戴罪立功而命卿以署都督僉事充副總兵官分守松潘等處既而工科給事中張元冲劾兵部尚書路遜用卿不以會推而於題覆廢亂典章上曰卿已有成命自今本部用人毋廢會推○兵部尚書路遜上防秋八事一日預有京軍言吉囊方渡河任青山後若越天城陽和而南則紮荆危又聞獨石山後有虜住牧若越龍門長安嶺而東則黃花鎮驚宜預訓團營兵部署諸叅將遇警調發隨賊所向用收犄角之功二曰團結堡夫言邊民多有驍捷者可編立保甲遇賊截殺以助官軍之勢三曰閱理兩關言國家定鼎燕京自黃花鎮以東歷密雲馬蘭太平燕河屬山海為東關以西歷居庸白羊紮荆倒馬屬龍泉為西關復設以重門屯以重兵築保修牆翼然天險往時加以斬削虞難防禦宜令御史巡視補葺四曰預防孤鎮言薊州在天壽山後兵力單弱萬一窺伺薊

州震驚陵寢騷擾邦畿如虜大舉宜合三鎮之兵并京營人馬合擊之
五日詔徠武勇言草莽之中有精通武畧膂力過人者檄下所司多方
延訪不限名數厚給衣糧送各營出力報效俟有功之日通計陞賞六
日蒐訪廢材言邊將律戰不宜以一青終廢諸可原者請以名聞七日
厚賚降人言邊人陷虜來歸者將士或詐殺以冒功絕其還心宜行禁
約八日量移邊兵言日者本部徵山東河南民兵擬五月赴磁德二州
聽調而奉旨止令本省練卒尚有不虞恐犯千里趨利之戒乞乞前議
上皆從之○巡撫應天都御史歐陽必進言應天等十一府旱災乞留
解京銀三萬兩賑濟許之○以淮陽重災命兩淮運司發餘鹽銀二萬
五千兩賑恤竄丁從巡鹽御史劉存德請也○巡撫保定都御史蘓祐
等奏修築戡荆諸閘工完延袤六百餘里隘口百餘處詔賞祐等銀幣
○南京給事中游震得等請復原任考功薛應旂京職言大計黜陟主

自部院大臣而條其行能致其詳審考功即中實司之日者薛應旂公
忠任事不避怨尤乃以謗讟補外非所以勸忠勤下吏部議尚書唐龍
覆言應旂疾惡如讟去奸宄脫過抑官邪昭然在人宜復京秩以勸後
之當事者 上乃從震得請○三月詔逮繫巡按湖廣御史包節于獄
謫戍邊初承天守備太監廖斌擅作威福節至之初欲繩以法而語先
泄斌思中之于是候節謁陵時故獻膳羞遽使撤去而詭稱節麾出之
斌奏已發節始奏 上怒以節抵飾已罪逮詔獄卒坐大不敬謫戍遠
邊○刑部尚書高友璣卒贈太子少保謚恭簡友璣樂清人安重有操
執不避權幸屢蹶不挫士論推重○夏四月命山西巡撫魯銑以原官
總督陝西三邊軍務○議立招降賞格時邊臣言沿邊軍士招致降人
宜立為賞格以昭激勸兵部尚書路迎等議擬上格例大邊外招男子
一人賞銀三兩迺加至十五兩止幼男婦女二兩至十兩止墩邊引入

一男子賞二兩迺加至十兩止幼男婦女一兩至五兩止又議嚴禁徽
卒毋擅縱人出境毋取邊人詐為降人冒賞詔俱如議行○諭禁凡被
論官毋得攻擊論者時給事中羅崇奎言近年以來諸臣被論多強辯
飾罪反詆言者而輕排之如戶部尚書閔楷貪鄙有聲給事中萬虞愷
游震得論之當也乃反讐言兩人亟圖陷害至借後湖銀兩之事公為中
傷之術且後湖貯掌有人度支有額楷乃謂數不止此假手報復險亦
甚矣乞嚴加勅諭以後凡被論諸臣宜杜門省愆不得論辯即有論辯
亦無得輒攻擊言者請如楷所疏令南京都察院遣御史一人稽查後
湖銀數庶得其實○五月詔錄磁州死事生員王邦直子王化燭為磁
州守禦所正千戶○虜酋俺答遣使進貢乞和邊卒殺之時俺答阿不
孩遣夷使保兒寨等三人投番文有白駱駝九頭白馬九匹白牛九隻
及金銀鍋各一求進貢講和自後民種田塞內虜牧馬塞外各守信誓

墩卒納之總兵家丁董寶徂石天爵事殺三人以首功報總督萬達
因上言董寶么麼賤卒壞法貪功彼執物示信託墩卒通款即不許
當善詞以遣乃誘而殺之此何理也董寶等滔天之罪真不容誅乞亟
正法典榜之塞上預弭其蓄怒構兵之謀即不可解臣等相度幾宜按
兵待戰䟽下所司既而又請自今各邊有妄殺歸降人冒功者如按得
實不必解京令巡按梟斬示衆以杜奸人玩法之心報可○六月兵部
尚書路迎罷以陳經為兵部尚書○巡按廣西御史馮彬請勦徭僮不
許彬上言廣西之患莫甚徭僮與其召募以防賊不若召募以勦賊據
其巢耕其土凡賊之美田肥土我兵無不願得之者因其願而令之幾
不勝矣部議廣西一省狼人居其半其三徭人其二居民以區區二分
之民介蠻夷之中事難猝舉且免差應調土狼積習今日應募以平之
者安知他日不各據其地轉而為賊乎宜下撫按議從之○詔收山場

湖陂河道諸稅時戶部尚書王杲上言國計匱乏宜預為措置以濟邊餉因請收復山場湖陂河道諸稅金上曰漕輸歲四百萬石故事俱輸本色邇來任情折減累朝積貯支費無經不聞時有稽覈以致府藏空乏歲出不敷爾戶部職司邦計責將誰諉所條山場諸稅姑行查處以濟邊用○詔逮繫原文選郎中高簡于獄論戍邊初簡為文選郎引用私黨給事中楊上林劾簡聚弊積困大壞銓規不報既而簡出補叅政御史陳九德等復劾其徇私殖貨引用匪人何遷茅坤等上乃命遣官逮繫至京下詔欲論戍何遷茅坤俱補外職其餘鄒守熊過等俱削籍○吏部侍郎董玘卒謚文簡玘會稽人博學能文性峭直始為吏部主事絕請託鄉人多怨之後落職三年始白○吏部尚書唐龍罷尋卒龍以文選高簡故三疏乞休上以為稱老忘君令削籍為民及出都門遂卒龍蘭溪人性疎爽有文學經畧關中大著勞績一時稱為才

臣父之詔復原官贈少保謚文襄○詔停止各開納事例○擢總督漕運巡撫鳳陽右都御史王暉為戶部尚書總督倉場兼理西苑農事○秋七月命戶部發銀米賑恤京師轉徙居民其房屋傾圮者加給之時京師霪雨戶科給事中李珊疏請修省會雨已止上曰霪雨為災即日躬禱已荷天恩賜霽修省不必行朝廷有弊政當革者各官宜秉公指奏處分庶盡應天之實因降諭賑濟○詔增貴州鄉試解額五名先是額定二十五名至是撫按官王學益蕭端蒙言本省人才加盛近又附湖廣鎮遠五衛軍生乞量廣解額詔增至三十名遂為例○詔錦衣衛捕繫天寧寺通法師等衆訊治時禮科給事中李文進言邇年宣武門外天寧寺中廣聚生徒輒建壇場受戒說法擁以輿蓋導以鼓吹四方縉衣集至萬人瞻拜伏聽晝聚夜散男女混淆甚有逋罪黥徒髡髮隱匿因緣為奸故四月以來京師內外賊盜竊發輦轂之下豈宜有此

又富民豪族朋連黨結倡為外護愚民無知破財竭產爭先布施因而
乾沒重耗民財大者基亂小者導侈皆非細故乞捕外護為首者數人
及通法師者按治其罪諸郡邑名山古刹如有佛子法師假以講經聚
衆至百人者一體禁止如此則邪說不興異端日熄疏入詔錦衣衛捕
訊餘下禮部禁治○以左都御史張用為吏部尚書用辭不允○總督
宣大侍郎翁萬達請發銀製造火器言臣嘗倣火器之制造成三出連
珠百出先鋒鐵捧雷飛毋子火獸布地雷等砲屢經試驗比之佛郎機
神機鎗等器輕便利用因請帑銀二萬兩督造分發宣大三關并各邊
城堡應用兵部試驗言三出連珠百出先鋒鐵捧雷飛俱利可用則宜
多造其火獸布地雷砲用之昏夜劫營則可用之行陳似非所宜似應
量造議入報可○八月甘肅天鼓鳴○加封真人陶仲文為神霄紫府
閩範保國弘烈宣教振法通真忠孝秉一真人掌道教事更給誥印陞

工部帶俸尚書盛端明顧可學俱禮部尚書以萬壽聖節加恩也○四
川巡撫都御史張時徹請撫勦番夷從之時徹上言川蜀之地民夷錯
居住者番奴一族流入石泉縣白土諸鄉號白草番于時我軍不即剪
蕩徒扼要地守之今真酒平番關堡是也比者遊擊周庚作威妄殺召
怨起釁而亡命奸人導引搶劫于是關堡陷沒守將俘虜而賊勢愈猖
且二關堡者番寇之咽喉也我既失陷賊乃得逞羊腸鳥道縱橫出入
而全蜀為騷動矣夫不大創者不久懲不一勞者不永佚為今之計莫
如量調漢土官兵三萬分布要害直搗巢穴盡殲醜類以張天討如番
蠻畏威納款獻還擄掠人口擒送首惡情願築立關堡分地認守者聽
臣便宜撫處兵部覆其議是 上許之令相機撫勦○詔修京城九門
城垣以天雨損壞故也○巡按山東御史張鐸進十眼銅砲大彈可及
七百步小彈可八百步四眼鐵槍彈可四百步皆足陷陣摧鋒詔工部

如式製之。○詔奪薊州巡撫都御史郭宗臯等俸。初宗臯奏報虜四
萬在宣府得石欲東西分犯。輒請京營山東河南兵為援而竟無其實。
其後宣大總督翁萬達奏七月十一日虜犯宣府北路龍門。參將董麒
不報督府而輒率所部勦之。斬首三百餘級。其明日守備陳勲死於陣。
遊擊呂陽與虜戰二日乃歸。麒與坐營指揮谷泰帥兵先還不為救。遇
遊擊郭都旗牌官王浩于青沙梁。告以虜且去。俱罷歸。因劾麒擅命辱
師請付法吏。上下其章于兵部。因併青薊州警報。請張之罪於兵
部。參論董麒谷泰不救勲陽之戰而過都浩之援。俱屬有罪。而麒之匿
報尤甚。巡撫孫錦總兵趙卿不能發覺。俱宜併究。郭宗臯過聽輕舉。罪
亦難辭。得旨宣府之匿警報。與宗臯之妄告。請張遂使騷動京兵靡耗
糧餉。厥罪惟均。姑從輕奪宗臯俸一年。錦卿各半年。兵部覆奏。回護姑
不究。董麒革任。谷泰逮問。○宣府總兵張達疏請以舍人尹秉義等三

人自隨給事中劉學易言其故。奏帶冒功之弊。乃禁不許。○詔旌嘉定
烈婦張氏。建祠賜名。袁貞。嘉定民汪綬妻張氏。其姑陸氏。淫縱惡。張諫
正。乃與所私執殺之。舉火焚室。欲滅其屍。而不得。至是。獄成。巡按蘇松
御史王言以聞。詔有司建祠祀之。名曰哀貞。○虜入陝西。總督三邊兵
部侍郎曾銑請復河套。時套虜三萬餘人入保安塞。大掠延安府。至于
三原。涇陽。掠殺人畜。銑等以聞。上謂今年失事頗輕。不必查覈。銑乃
上疏請復河套。言河套古朔方地。漢武帝命衛青逐虜。因河為塞。唐張
仁愿復於河北築三受降城。即國初東勝衛及東西受降城地。後三城
內徙。套為虜穴。守禦煩勞。三秦坐困。故套虜不除。中國之患未可量也。
臣嘗較之。秋高馬肥。弓矢勁利。彼聚而攻我。分而守。則虜勝。冬深水枯。
分帳散牧。馬無宿藁。日就羸瘠。春深陰雨。彼勢益弱。我乃淬礪戈矛。備
具火器。往乘其敝。時則我勝。今不乘其敝。而用吾利。是以鮮功。請以練

卒八萬人益以山東鎗手二千每於春夏之交水陸並進直搗巢穴歲歲迭擾虜勢必折而遠遁我乃并河為塞修築邊垣分置衛所修復屯政轉輸可省形勢益壯中興大烈其在斯乎因條為八議一曰定廟謨二曰立紀綱三曰審机宜四曰選將材五曰任賢能六曰足芻餉七曰明賞罰八曰修長技計萬餘言指據明悉詔下兵部議行○戊戌有流星西南行時南方流星大如碗赤色光如斗大起自中天向西南去○調巡撫甘肅僉都御史傅鳳翔於江西初鳳翔為陝西叅政擢僉都御史巡撫甘肅亡何遽改江西于是給事中楊宗器劾奏鳳翔狡譎競進夤緣避趨始以經武籌邊圖著論干進即由叅政躡取巡撫一壽未展遽自甘肅改撫江西使鳳翔不宜過材何以叅政而驟列僉都使果有經畧又何數月而輒移內地計鳳翔之姦不過欲假邊方為進取捷徑耳况又犯清議日事營求速宜罷黜以戒奔競事下吏部竟議留用○

以山東叅政楊博為巡撫甘肅僉都御史○九月土魯番入貢初番酋大者阿克力等八百七十四人來貢入嘉峪關巡撫傅鳳翔總兵官仇鸞不知為計俱令住劄甘肅館穀之既而鳳翔得江西命以去楊博來代博至甘州疏聞請自上裁上命量留數十人入貢餘令出關鳳翔鸞博各奪俸有差○番酋乞地住牧不許馬黑麻速壇等欲入貢內附求討地方住牧總督張珩以聞部議欲照牙木蘭事例安插上曰甘肅自經土魯番戕害哈密以來藩籬侵廢赤斤地方日益削弱回夷占住甘肅生息日繁貽患甚深馬黑麻速壇踵習父兄舊惡包藏禍心今又結婚瓦剌陰據哈密占種沙州土田意在內侵且因謀洩遂爾授降原非本意姑且俯順其情容其入貢其求地住牧等俱不准行○南京戶部尚書周金卒贈太子太保謚莊敏金武進人豁達警敏有經制才自正德間歷諫垣九年都督馬昂獻既娠女弟驟寵金抗章請誅昂

還其女久之得遣後敷歷中外勞績甚著○南京給事中張思誠請禁問刑深刻者從之思誠言在外問刑衙門罔知明允競為刻深如殺人驗傷互異輒擬抵死盜賊賊証未明竟坐強劫被誣淹禁不日官不早決一斃于獄則歸各原告比以誣告致死之條積年攬役不日官相容隱一觸其怒則搜剔隱過按以久戀衙門之律擒捕私鹽者未出行鹽地方而槩引越境查盤倉糧者不論多年滯濫而槩引侵欺諸如此類不可殫述乞加禁治部議如思誠言 上令即行撫按嚴加綜覈并會同吏部訪察殘忍者大計黜治○冬十月進甘肅巡撫楊博為副都御史初宰東屬夷為土魯番所逼內徙入關王瓊處之肅州近郊久為民患博至知邊人苦之乃召其酋長諭曰汝等寄居此地非久遠計地有白城威虜金塔諸處俱善水草吾為汝圖遷居之可為世業諸夷稱幸乃為築城堡于白城諸地遠者去塞五百里而遙近者亦不下百餘里

諸夷衆樂徙去積患頓消又河西屯地久湮廢博請于朝聽民苗畝寬以十年而後徵復貸牛噐穀種于佃者于是人爭應令因跡龍首渠故道分疏支瀆墾田萬餘頃簡壯卒田之謹烽燧勤偵候虜不敢輒至塞嘗一入寇諸將士拒不得入斬首虜四十餘級獲輜重萬計至是進博右副都御史○熒惑犯室壁室壁分野屬衛相守月餘赤色芒角怒甚○詔逮繫河南巡按御史侯度及守巡府衛正官俱詣京訊治時承天皇莊銀解至衛輝新鄉縣為盜劫去掌解內使奏聞 上怒甚奪巡撫柯相俸戴罪捕賊詔械繫巡按侯度等至京度杖而斃餘各降二級久之獲賊或以為非其實云○詔陝西巡按逮訊僉事毛一言時總督三邊侍郎魯銑劾奏一言管理糧餉貪鄙恣肆部從不謹例罷之 上詔令巡按逮訊仍令自今以後凡邊臣被論有干軍機錢糧者吏部勿得槩擬罷職○辛卯金星晝見○建昌侯張延齡薊遼總督侍郎胡守中

死於西市時處決重囚五十人延齡守中俱伏罪死○十一月代府奉國將軍克灼等謀反伏誅初克灼等八人與俊桐等聽惡少張文博等謀誘虜酋小王子至大同為亂事泄總督翁萬達上其事 上命械繫克灼等至京考訊有據克灼等八人俱勒令自經燬其屍俊桐等謫為庶人禁錮鳳陽張文博等二十八人磔斬有差仍梟首大同塞既而兵部訥叙錄諸邊臣功言大同總兵周尚文應猝有機首剪禍本宣大總督翁萬達大同巡撫詹榮密上邊事追捕無遺功當優論宣大巡按谷嶠給事中李文進御史趙炳然皆有輶訊發摘之勞而山西巡撫曾銑巡按陳豪得鄰封渠惡于其界中功皆次之代王專鎮封內雖不能預察奸萌而事發之後景駭響震不至 虞亦宜降璽書優獎 上從之乃加周尚文太保翁萬達左都御史 兵部右侍郎其餘各陞賞有差○詔邊臣勿得變亂屯政時巡撫甘肅副都御史楊博疏陳屯田事

宜部議言經畧河西莫先興復屯田而屯政不舉者催科擾之也種未入土而名已在冊人已在逃請令諸邊臣召民開墾永不徵賦其故常徵賦後復荒蕪者並許佃種一體蠲免凡邊臣敢有變亂屯政者巡按叅治論罪○兵部侍郎陶諧卒贈兵部尚書謚莊敏諧會稽人剛介不撓歷事三朝奉公守正終始一致○十二月諭令內使侯章論斬先是章毋笞死女婢章懼泄支解藏于甕事發法司擬當絞律 上諭刑部章宜以故殺律斬○詔議後河套先是三邊總督曾銑請復河套部未議覆至是銑請破常格發帑銀以築邊牆因復上言河套可復謂邊牆不過數十年計而復套則萬年久遠之計併下兵部議尚書陳經等覆言築牆復套俱不易而復套尤難縱使能復亦難為守 上曰虜據河套久為內患連歲深入全陝被其荼毒深軫朕懷前日邊臣無有以還虜為念者曾銑所奏具見壯猷爾部內日久方題覆迄無灼見何也還

令銑督同各邊鎮巡官協心圖議務求長策嗣上方畧其邊垣千里沙漠與宣大地勢不同止可將要害修築茲暫發兵部銀二十萬兩付銑為邊餉軍械諸用勿得浪靡○詔勅睿宗小孤山紀勝詩於石仍令建亭江西省祭官繆建賢上奏言睿宗獻皇帝就封之日舟過小孤山製詩紀勝書于神祠臣道經其地恭錄以獻 上喜賜建賢絲幣乃命工部製碑書勒仍勅巡按官建亭貯覆

丁未嘉靖二十六年

奉正月甲寅朔山西巡撫楊守謙請經理營田從之守謙言偏頭老營二所餘地一千九百餘頃堪為營田以內省京運外嚴防守且舉副使張鎬為提調通判張應麒為總委官欲久任責成其牛種皆取自本省又擬照盜沿邊錢糧禁例以防侵盜事下戶部尚書王杲覆言守謙所疏綜理周密若各鎮營田似此舉行則兵食可足而帑積多省 上命

行之○遣還瓦剌諸夷出關先是瓦剌達虜卜陸喜兒等三十人以避哈密諸夷侵掠內附至是求還甘肅守臣以聞詔即遣出關○命戶部發銀十萬兩於延綏賑濟時戶科給事中劉起宗言邇者調山西巡撫都御史楊守謙於延綏誠為得人但延綏頃年以來兵荒相繼民皆救死扶傷之不暇若非朝廷加意優恤出格賑貸則無以振其弱而固其心誠宜捐金數十萬以舒眉睫之急然後諭令守謙度勢量力或議營田或議入粟或議因時和糴或修鹽糧飛輓之舊或覈內地逋負之租如此庶可為邊方善後計奏入 上是其言命戶部發銀給之仍令守謙查核該鎮缺乏之由以聞既而戶部言缺乏錢糧不獨延綏一鎮其在山西大同遼東甘肅諸鎮盡然此皆各省供邊錢糧徵解不完所致宜行撫臣一體查叅治罪詔從之○改江防總兵官沈希儀克副總兵官鎮守廣西兵部言廣西缺副總兵宜補而希儀生長粵西諳熟夷情

先防柳慶夷獍畏服今亂人未盡剷除宜調用以撫定之得旨准改仍命以後將領生自兩廣雲貴四川者不得推入京營及西北邊用著為令○詔奪尚寶卿席中俸先是中城旗守衛地方掘得牙牌四面一東寧伯一彰武伯一永順伯一燕山左衛指揮僉事至是都察院叅論中等防範不嚴以致盜遺在外請量加罰治詔各奪俸一月仍令查明開奏○改刑部尚書聞淵為吏部尚書○二月勅諭天下朝覲官時官陞辭賜之勅曰朕續承丕基撫御方夏二十六載於茲任大責重宵旰兢兢永惟四方萬國豈予一人所能徧察所冀承流宣化與我共理者其惟諸藩臬郡有司乎爾天下来朝大小官員除不職者已令部院以法降黜外爾等仍還舊職其各仰體朕奉天保民圖登至治之意惟仁以愛民勤以建事忠以體國庶以守身斯為稱職無齷貨以肆無淫刑以逞無阿諛以干進無欺詐以飾名有一于茲足以傷和害治國有嚴憲

將不爾貫爾等其勉之戒之既而給事中陳棊將勅諭衍作官箴十章上之上曰陳棊舞弄文墨輒欲將此並勅令風示在外臣工甚為狂僭乃令陳狀棊引罪命降調外用○召南京刑部尚書屠僑為刑部尚書擢工部左侍郎文明為工部尚書○陝西階州地震有聲○給事中查秉彝疏陳利弊七事一曰事權不一今之監司有布政按察使有分守分巡職至重矣迺又有清軍黃冊糧儲驛傳屯田兵備江防教者何冗也除事關機密軍務員須顯設者釋弗議外其可併省者宜一切專責守巡二曰用法太苛我朝大明律令垂憲不易至見行條例多出臣下一時建白今宜嚴故入之條重誣告之律革過前犯毋得牽引法官問刑止於用律勿輕用例以杜深文之漸三曰稽查煩類夫查盤之權宜總于巡按而間歲一舉之今巡按查盤矣巡撫復行之守巡各道又行之至有一人而三四罪一罪而三四招一事而株連數十人適開吏

蠹宜且從省併四曰罰贖禁違律科罰二十兩以上者送部降用雖專以
守令言監司亦同守也今有罪贖至百兩以上者有無故勒民粟至數
百石者甚至有給散人家產者又有從輕發落量折工價者宜明律令
慎罰贖以懲贓濫五日徵科無藝今財賦所出倚重東南宜定限輸糧
使各里收入官而官總其數戶僉糧長者不僉解頭其僉解頭者必官
庫領銀實批銷繳以絕那借累賠之弊若府州縣官類解者毋得攜帶
解頭以滋需索六曰徭役不均國制差役十年一編九年休息法至明
備邇來州縣喜於紛更年年編役甚至括索幼丁審編餘銀以充私橐
如弓兵責其賠補鹽斤斗級責其賠償耗米宜申明徭役舊法使勿厲
民七曰供給過侈州縣有坊里之供辦其初以給賓旅上官而今則官
吏夫費苞苴結納悉從倚辦宜一切禁革章下部院覆如其事詔從之
○禮部尚書費宋知貢舉以從子懋文應試請令侍郎崔桐入場領題

從之○左都御史宋景卒贈太子少保謚莊靖景奉新人練達國體志
行剛方一時縉紳咸推重之○詔改工部尚書王以旂為左都御史○
吏部尚書周用卒用吳江人端亮有節操晉掌詮曹縉紳方望其丰采
乃未有所建立而卒士論惜之賜祭葬贈太子太保謚恭肅○會試天
下貢士命掌詹事府吏部侍郎孫承恩掌翰林院禮部侍郎張治為考
試官取胡正蒙等三百人○詔革新立戰鋒五營先是巡撫王儀總兵
卻永選各營精銳五千人別立戰鋒五營每軍額外加米五斗至是宜
大總督翁萬達言其弊謂五營各領以廢棄將官又別取老弱步卒用
充原數及遇戰陣復自以為親兵居後反驅諸路兵為前蔽坐是士多
解體請罷坐營官而歸其兵于各營各路 上謂戰鋒五營之立變亂
兵制即令革罷軍士勒歸原伍○朝鮮國執獻通倭商船初福建福清
縣民馮淑等三百四十餘人擅收繒綺布綿諸貨違禁泛海私通日本

鬻利值大風飄泊朝鮮界中候者執之以白其國王李峒峒即遣譯使
順宗監送淑等及諸貨物于遼東都指揮使司巡按山東御史張鐸奏
聞于朝 上曰近年沿海地方通番細民干犯國法視為故常福建諸
處尤甚往往為外夷擒縛有傷治體皆海道官不職巡按御史其查劾
以聞○御史具相上議冊封遣官言宜求端重老成者如侯伯數缺即
於國戚都指揮內簡用侍衛團營侯伯不得畚差從人騷擾聽所司治
罪報可○三月諭立邊方官選用陞遷格 上諭吏部曰近年西北邊
方防虜多事任用要在得人爾部內宜留心選用總督撫按官宜不時
刺舉以憑黜陟西南蠻夷邊方亦用此例其別立選用陞遷資格以聞
既而三邊總督曾銑上言邊方守令所係甚重必選年力精銳才幹強
敏者銓補其有稱職者宜特加獎擢乃下部議尚書聞淵議覆言邊方
守令通將應選者量酌地勢遠近取年力相應者除補毋以告就邊方

者槩授各巡守邊境者務擇才選用毋以才力不及官改調其平時撫
綏有方遇變建立奇功者不拘守令兩司不時薦舉破格超擢 上允
行之○廷試賜李春芳張春胡正蒙等進士及第出身有差○山東汶
上盜田斌等流劫泊河都御史詹瀚擒平之詔逮繫巡撫山東都御史
何鰲于錦衣獄削籍初汶上人田斌及其妻為白蓮社僧惠金及妖人
楊惠所愚嘯聚数千人流劫曹單濮陽諸處掠得丁壯輒以熬毒醉之
列置前陣不避死傷以故所向無前黨與日衆州縣不能誰何事聞
上命速擒首惡解散脅從勿令滋蔓貽患地方既而南掠至徐鳳間治
河都御史詹瀚集役卒格鬪敗之追兵繼至斌乃就擒餘黨解散去山東
巡撫何鰲以捷聞 上曰妖寇扇惑愚民地方官不能擒捕解散以致
淮北震動河南繹騷所奏擢賞例不准行其良善被禍者巡按御史查
覈奏聞于是山東巡按張鐸以賊所由平奏上 上乃命械繫何鰲至

京下錦衣獄久之削籍為民○夏四月詔逮繫巡撫山西都御史孫繼
魯詣京先是總督宣大翁萬達議大同為山西藩蔽大同有備則山西
無虞將來可以漸撤客兵繼魯言論長遠大同差急山西差緩論緊邊
山西大同並急今欲止守大同豈得無憂萬達復奏繼魯沮排成議乞
賜別處兵部尚書陳經言繼魯不能虛心揆事責其共濟誠難 上曰
萬達與周尚文悉心協謀勿以繼魯言疑沮繼魯敢背明旨挾制總督
阻壞成事遣官逮至處分繼魯性剛介未幾竟械死詔獄○四川巡撫
都御史張時徹檄兵討白草番蠻平之先是時徹與副總兵何卿請會
兵進勦乃調天金高繼光馬湖王祥等率兵討之俄而平定奏聞 上
命進時徹為兵部右侍郎何卿都督同知○命修兩京國子監學舍○
詔革南京提督糧儲都御史以南京都察院副都御史或僉都御史
提督南京糧儲至是提督僉都楊宜以京儲事物議沸騰給事中張汝

棟論劾宜因請裁去提督下廷臣集議從之遂單都御史併于南京戶
部侍郎總督事著為令○吏部尚書羅欽順卒贈太子太保謚文莊欽
順泰和人學術醇正操履端方為世儒宗○命考選庶吉士於東閣
上親賜題文曰原心詩曰善為寶取尤思謙等二十八人送翰林院讀
書命吏部左侍郎兼翰林學士張治右侍郎徐階亦兼學士教之○虜
酋俺答乞入貢不許宣大總督翁萬達上言俺答求貢請叅酌可否巡
按御史黃汝桂疏奏虜自火篩為梗貢禮寢廢迄今四十餘年自嘉靖
辛丑虜人肆叵測之謀石天爵倡入貢之請去歲至今又復踵行前詐
豈可輕信隨虜計中蓋虜自庚子以來連年蹂大同入澤潞破宣府抵
紫荆西掠延綏東寇遼陽凡我臣工皆宜志殲醜虜以雪積憤但時未
可乘勢當徐圖耳故貢亦寇不貢亦寇者夷狄之故習也貢亦備不貢
亦備者邊臣之至計也事機貴于先圖軍令重于申命乞嚴勅總督鎮

巡過加防禦 上曰逆虜連歲寇邊詭言求貢勿得聽從其各邊嚴兵
禦防如有執異處以極典時陝西有復套之議將督兵出塞當事者主
之故力絀貢議云○五月三邊總督曾銑龍虜勝之詔賜銀幣增俸一
級初春中銑督兵出塞掩擊虜未得利至是復出塞襲擊虜覺整眾拒
之銑蒐選銳卒督之出戰馘斬二十六人生擒一人脫脫虎斃于矢石
者甚眾獲牛馬駝橐九百有五十夷器八百五十三虜移帳漸北間以
輕騎入掠銑復督諸軍驅之遂遠遁不敢近塞銑以捷聞因列上諸臣
功罪 上曰套虜連年深入如蹈虛地大損國威銑能率兵出塞擒
斬有功乃詔增俸一級賜以白金四十兩紵幣三襲巡撫謝蘭李士翔
巡按盛唐及守備諸臣各賞賚有差○詔謫南京守備太監丘得為淨
軍時南京給事中雷賀劾奏得以寧彬逆黨竄綠進用貪婪殘害不可
以司根本重地 上命仍充淨軍○給事中何雲鴈疏論考選臺諫納

之雲鴈言考選臺諫當取宋司馬光所言不愛二田貴重惜名節曉知治
體三事為選用之則勿以毀譽為用舍乞勅諭史部 上納其言○六
月加真人陶仲文特進光祿大夫柱國任一千尚寶司丞時仲文以正
從一品滿六年吏部尚書閻淵奏請 上曰仲文歷俸年深忠勤懋著
宜加秩任予以示酬眷故有是命○陝西總督曾銑論劾甘肅總兵咸
寧侯仇鸞詔奪鸞俸銑言延寧大虜壓境修邊之後尚未畢功故臣檄
莊浪魯經兵三千暫駐蘭州適中之地以為應援乃鸞疏撫本鎮兵馬
寡少故違節制不聽調遣而巡撫楊博附和上請并乞責成 上以鸞
沮撓軍機妨誤邊事但秋防在即各奪俸數月兵科給事中齊譽因言
前宣大總督翁萬達與山西巡撫孫繼魯謀議不合已形訐奏今秋深
虜警羽檄旁午而鸞等復與銑爭持不下請降嚴勅令無誤邊事 上
是其言○詔設提督浙福軍務都御史巡按浙江御史楊九澤言浙江

寧紹台溫連延福建福興泉漳諸郡時有倭患兩省官僚不相統攝臣謂巡撫重臣亟宜復設上曰浙江首省天當倭夷入貢之路如議設巡撫兼轄福建等處提督軍務著為令○倭寇寧台詔以朱統為右副都御史巡撫浙江兼攝福建地方初統未至官有倭百餘艘久泊寧波台州諸處約衆數千人登岸殺掠無算焚毀官民廨舍數百千區巡按御史裴紳論劾防海副使沈澣守土叅議鄭世威因乞勅統嚴禁泛海通番勾連主藏之徒上乃諭令統統至浙廉知沿海大姓皆利番舶勾連主藏貴家尤甚凡夷舶至爭致其家皆以虛值轉鬻牟利而值不時給夷衆怒以是構亂相殺傷乃下令申嚴海禁凡雙檣餘艘一切毀之任怨任勞嚴戢閩浙諸貴家嘗言去外夷之盜易去中國之盜難去中國之盜易去中國衣冠之盜難上請鑄暴貴官大姓通番二三渠魁姓名戒諭之于是聲勢相倚者大誅切齒○馬羅番蠻為寇巡撫四川

都御史張時徹督兵討平之詔賜時徹及巡按御史表鳳鳴兵備副使朱簞等各銀幣有差○鎮守雲南總兵官太子太保黔國公沐朝輔卒贈特進光祿大夫右柱國太保謚恭僖賜祭葬如例○秋七月戶部都給事中厲汝進上言國家設鈔關於商賈貨聚之地分委戶部屬官監收近見本部委用臨清鈔關主事間以志行卑污景暮途窮者處之非所以慎選任防侵漁也又言各邊管糧郎中往往以贓敗尚書王杲曲為回護無誠心為國家之義宜戒諭之奏入杲自陳朴愚願圖後效因言科臣所言臨清鈔關主事本部即移文戒飭并申嚴差滿考察之例上以科臣未嘗顯言戒飭無據王杲令盡心供職其考察屬官如議○山東漕縣河決城池漂沒人民死者甚衆工科都給事中劉大直論劾河道都御史詹瀚等得旨命巡按御史查覈以聞既而御史党承賜言瀚及副使張九叙等隄防失策詔奪瀚俸九叙等下御史逮問○巡關

御史王士翹請築堡城言居庸關半里外岔道堡居民輳集而土城卑
圯乞令增築并掣隆慶衛備禦永寧官軍二百五十人守之詔許增修
城垣其官軍備禦如舊○陝西甘州五衛風霾晝晦尋變赤復黃○詔
諸道官軍年例銀兩得隔年預支時巡撫宣府都御史孫錦管糧郎中
岳玳上言松居馬營等堡官軍告求冬衣布花及積欠月糧乞借明年
年例銀八萬兩戶部覆如其言 上以預發隔年銀兩不可為常命戶
部計處改正未幾大同督撫諸臣復以預借為請報如前旨以再請准
以六萬兩給之已而戶部言年例銀兩每年于正月題請差官給發不
得隔年預支詔如議○大學士嚴嵩請賜橋名言臣屢荷恩賚無由上
谷會鄉郡饑饉用賜金買穀賑濟又葺郡北秀江橋一座建上下浦石
橋二座推廣德意請賜橋名詔名廣澤廣潤○乘一真人陶仲文請度
天下道士從之凡度二萬四千人○詔禁戢京師○吏部右侍郎王道

卒道武城人潜心理學多所著述持論不苟同于俗為士論所重○延
綏守禦李越計殺貢夷收訊論死時延綏有入貢夷至越誘而殺之遇
伏發沒軍甚眾巡按陝西御史盛唐奏收越等鞫訊論越及裨將陳守
節各斬餘眾編戍奪俸有差獄成上之下部院議左都御史屠僑等集
議請如唐論從之○以刑部郎中陳鳳為江西僉事鳳在部時故事省
中所訊獄多嚴衛逮至者主者畏其威止視成案擬罪莫敢輕重鳳多
平反之省中稱能至是出僉江西○八月工部尚書甘為霖卒○大學
士賈詠卒贈太師謚文靖詠臨穎人以大獄誣誤引疾乞休居鄉以醇
厚聞○九月以左都御史王以旂為兵部尚書提督團營軍務○詔逮
繫戶部尚書王杲御史艾朴及總督太倉尚書王禕于獄論杲朴戍邊
暉削籍給事中馬錫奏劾杲朴私受兩淮運司緝管王正大賂勒郎中
余善繼收納不足銀色 上怒逮繫杲等廷杖之下獄給事中厲汝進

等復劾總督尚書王暉等皆有請託宜加窮治復逮繫暉廷杖併鞠訊之鎮撫司廉得運副張祿與群官侵弊以聞詔行巡訊祿捕論杲朴戍邊暉為民後杲竟死戍所公論寃之○閏九月詔罷巡撫雲南都御史應大猷時給事中鄭大同論劾大猷所屬藩臬有司有舉無劾避忌長奸請加罰治上曰撫按舉劾憲綱舊例雲南遠在萬里外貪官酷吏倍甚他省大猷居任日久豈無一人堪劾耶違例廢法大傷憲體罷職不叙○冬十月建皇考睿宗聖製詩碑亭于小孤山○虜酋兀良哈寇遼東○御史陳其學論劾錦衣都督陸炳駙馬都尉京山侯崔元上以輸罪釋之其學論炳蠹亂醜政及擅禁小錢諸不法又論元容廝養徐二權取官益諸貪肆狀大學士夏言欲從中下捕治炳炳泣丐言乃已于是下旨收捕徐二等上令炳元自言狀乃俱輸罪乞恩釋之不問○陝西山崩分馳西安府澄城縣麻陂山先大吼如雷晝夜不絕歷

三日山嶺一百丈劈裂中半而下東西分馳三四里遺陞平陷○兀良哈復糾建州夷寇遼東○延綏巡撫楊守謙請重賞格從之守謙言激勸邊事惟在重賞賞不踰時則士心競勸今令甲斬虜一級者加陞一級不願陞者予三十金為賞已輕而又查勘文移動涉年月以致人心不勸近以宣大事棘增賞格四十兩猶未優厚請增為六十兩令即時給賞蓋陞級襲雁利于官旗有力之人窮邊之卒所顛在賞彼見獲功者即時持數十金出轅門有不相顧動色頓忘其死者乎部議宜通行九邊上命亟行之○十一月宮中火詔釋楊爵于錦衣獄爵前後繫獄凡七年人無敢為言者是夜宮中火傳詔急救爵爵家富平及歸有大鳥集其舍爵曰吾其死矣乃自為墓誌未幾果卒

謹按支進士大綸曰爵狷介清苦忠直性秉絕無干名競進之念居家時有旨逮繫官校以屬按臣乃故以好過從適爵方飯几有麥飯

一孟蔬一盤見按臣即與同食既畢官校入繫之爵即與偕行諸官謂曰盍亦一內別乎爵曰去矣勿復顧官校吐舌云楊君慷慨乃爾其磊落骯髒之氣可輕擬哉此予聆之原按臣者

皇后方氏崩 上即日發喪諭禮部曰皇后比救朕危奉天濟難冀同洪眷相朕始終不意遽逝痛切朕情其以元后禮葬之既而謚曰孝烈皇后○總督三邊曾銑上復套方畧時銑會同陝西巡撫都御史謝蘭延綏巡撫都御史楊守謙寧夏巡撫都御史王邦瑞及三鎮總兵官秦酌復套方畧條列十八事曰恢復河套脩築邊牆選擇將材選練士卒買補馬羸進兵機宜轉運糧餉申明賞罰兼備舟車多置火器招降用間審度時勢防守河套營田儲蓄及明職守息訛言寬文法處孳畜又上營鎮八圖曰立營總圖及遇虜駐戰選鋒車戰騎兵迎戰步兵搏戰行營進攻變營長驅獲功收兵各圖 上覽而嘉之奏下兵部尚書王

以旂會廷臣集議言曾銑先後章疏俱可施行 上曰虜據河套為國家患朕軫懷宵旰有年念無任事之臣今銑前後所上方畧卿等既以詳酌即會同多官協忠據謀以圖廓清其定策以聞○十二月詔收逮甘肅總兵官咸寧侯仇鸞詣京鸞在甘肅日久貪縱酷虐恣為不法初曾銑以防秋調取河西兵馬鸞執不發為銑叅劾 上令按臣查勘鸞知不可掩益狂悖無顧忌至是銑復發鸞十罪曰欺給朝廷擅作威福殘虐故殺貪婪骯髒法賸削卒伍侵牟邊餉私役戍丁騷動地方容養奸回圯敗寮服各疏指摠數千百言 上覽疏大怒命以山西總兵官王繼祖代鸞令錦衣逮繫來京訊治既而甘肅巡按張雨復言鸞黷貨養釁大失苗夷之心六事巡撫楊博又詳疏其欺罔貪暴三十事俱下兵部尚書王以旂覆言所奏夷情且人命十餘贓私鉅萬必須勘明方可正法 上是之○詔送交陞土官陳復宗孫陳璜于順天府學初復宗

宣德中來歸以殺賊功官錦衣正千戶後宗生賢賢生儒儒生一麟世廩于學官其後有詔裁革一麟子璜數引例陳乞從之

卷之七

四九

七若終

宣德中來歸以殺賊功官錦衣正千戶後宗生賢賢生儒儒生一麟世廩于學官其後有詔裁革一麟子璜數引例陳乞從之

